

## VASEGA FEOLOLO 2025

**MANATU AOAQ:** **FAALAGOLAGO I LE ATUA  
I TAIMI UMA**

**MANATU TA'IALA O IANUARI & FEPUARI:  
O NISI O TUPULAGA TOTOA**

E tele tupulaga totoa o le Talalelei. O i latou ua ofoina le ola mo Keriso ma ana feau, ma ua fai ma faaitaiga lelei i le ola o nai fanau. Peita'i, o nisi o tupulaga i lenei vaitau, ua saili i le malosi ma le poto lona loto toa. O nei mataupu, ua faamanatu mai ai nisi o tupulaga totoa o loo i le Tusi Paia, ina ia o tatou faata'ita'i i ai.

**ASO SA:** **26 IANUARI 2025 (Aso Sa Tupulaga)**

**NATAUPU:** **UA FAATAU ATU IOSEFA IA SA  
ISAMAELI**

**SINI:** Ia malamalama le vasega, i le toa o le loto o Iosefa i mea uma na tutupu ia te ia.

**TUSI FAITAU:** Kenese 37:23-28

**FESOASOANI MO FAIAOGA:**

O Iosefa, o ia o le atalii o Iakopo, ua sili le alofa o Iakopo ia Iosefa nai lo isi ona uso uma. Ua avea lea ma mafuaaga ua feita ai ona uso matutua ia te ia. I se tasi aso ua alu ai Iosefa e asi ona uso, ma ave le latou meaai, oloo leoleo mamoe i le vao.

I le tatou Tusi Faitau o lenei taeao, na ona taunuu lava o Iosefa, aveese loa lona ofu sa fai e ona uso, ae lafo loa i le lua, e leai se vai o i ai. Ua malolo le auuso e aai, ae omai loa ma tagata Mitiana nei, o tagata sa Isamaeli i latou. Ona latou faatau ese mai ai loa o Iosefa mai ona uso, i le 20 tupe siliva.

Pe ana leai nei tagata sa Isamaeli, semanu a nei e oti ai lava Iosefa i totonu o le lua, i le fia'ai ma le fiainu.

O Isamaeli, o tagata e tupuga mai ia Isamaeli le atalii o Aperamo ia Akara le auaua fafine Aikupito a Sara, lea na tuli esea mai le aiga o Aperamo ina ua fanau mai Isaako, ae na alofagia pea e le Atua. O lona uiga, e aiga uma lava nei tagata ia Iosefa, e tusa o faamaumauga a Kenese. O le sootaga lea o Isamaeli ma Isaako, o le uso moni, o atalii o Aperamo.

O loo faaalua mai ai foi e lenei tala, le toa o le loto o le tama lenei o Iosefa, e leai ma sona popole pe fefe aua na tumau pea lona faamoemoe i lona Atua. O le feau foi lea mo i tatou le fanau, ia toa lou loto e fai ai soo se galuega, ua tofia i ai oe e fai. Ia faamoemoe ma tatalo i le Atua e fesosoani mai i mea ua vaivai ai lo tatou taumafai a'o feagai ai ma aoaoga o lenei tausaga.

### **Uiga o Upu:**

- |      |             |   |                                      |
|------|-------------|---|--------------------------------------|
| i)   | ofu talaloa | - | ofu i fafo, e ufiufi ai le tino atoa |
| ii)  | lua         | - | o se pu telē sa i ai se vai          |
| iii) | 'ava        | - | ua aai i le meaai                    |

### **GALUEGA FAATINO: Taliga Fesili**

Tali mai fesili nei

1. Aisea na feita ai uso matutua o Iosefa ia te ia?  
Tali: Ona ua sili le alofa o Iakopo ia Iosefa
2. Asisea na lafoina ai Iosefa e ona uso i le lua?  
Tali: Ua feita ia Iosefa
3. O ai tagata na faatauina ese mai Iosefa mai ona uso?  
Tali: Tagata Mitiana
4. O ai na mana'o e faatau atu Iosefa ia sa Isamaeli?  
Tali: Iuta

5. O le a sau aoaoga fou ua maua mai ia Iosefa?  
Tali: Ia toa lou loto ma onosa'i i taimi uma

**PESE:** O le Atua e silisiliese

**A'OA'OGA:**

1. Filifili tatau le faaiuga e tatau ona fai
2. Ia e alofa atu i le isi ou uso
3. E alofa le Atua i tagata uma

.....

**ASO SA:** 2 FEPUARI 2025

**MATAUPU:** O ESETA LOTO TOA

**SINI:** Ia malamalama le vasega, o le loto toa o Eseta, na faasaoina ai lona ola, aemaise le ola o lona nuu o sa Iutā

**TUSI FAITAU:** Eseta 7:1-6

### **FESOASOANI MO FAIAOGA**

O Hatesa poo Eseta, o se teine sa Iutā, ua maliliu uma ona matua, ae sa tausia e Moretekai lona tausoga, e fai ma ona afafine (2:5-8) O se teine e lalelei lona tino toe aulelei ona mata. Na maua lona avanoa e nofo ai i le fale o le tupu o Asueru, ina ua sailia se masiofo a le tupu e sui ia Vasati le masiofo muamua.

I le tatou Tusi Faitau o lenei taeao, ua faaali ai e Eseta i le tupu o Asueru lona mana'o o loo i ai. Ina ua fesiligia e le tupu, poo le a se mea e mana'o i ai? O le tali lea a Eseta "Ia faaolaina o ia ma lona nuu uma, ona o i latou o tagata pologa. Auā o loo i ai le tagata leaga o loo taulamalama ia te ia ma lona nuu". Ua fesili le tupu, poo ai le tagata? Ae tali Eseta, "O le tagata ua ita mai, o

lenei tagata amio leaga o Hamanu” O le faatoga a le tagata ua tuu atoa i ai lona loto ma lona mana’o atoa, ina ia alofa mai ai le tupu o Asueru ia te ia. Na iloa e Hamanu, ona mata’u ai lea o ia i luma o le tupu ma le masiofo.

Ua fa’aali uma e Eseta lona loto i le tupu, ina ia faasaoina o ia aemaise tagata o lona nuu.

O le tatou mataupu lena o lenei taeao, ia tatou pei o Eseta i le toa o lona loto e faaali atu ai se mea oloo mana’o i ai. Ioe, o le toa o le loto o Eseta na iu ai lava na fai ma masiofo a le tupu ma faasaoina mai ai le ola o tagata uma o lona nuu.

### **Uiga o Upu:**

- i) Eseta - o le fetu
- ii) masiofo - toalua o le tupu

### **GALUEGA FAATINO-Taliga Fesili**

Tali mai fesili nei

1. O ai le isi igoa o Eseta?

Tali: Hatesa

2. O ai le tamā o Eseta?

Tali: Moretekai

3. O ai lenei tagata o Naamanu?

Tali: O le auauna a le tupu o Asueru

4. O le a le man’a’o o Eseta na tuu atu i le tupu?

Tali: Ia faaolaina o ia ma lona nuu

**PESE:** Eseta o se teine lototele

## **A’OA’OGA:**

1. Ia toa lou loto e fai se galuega lelei
2. Alofa atu i tagata o loo fia maua le fesoasoani
3. Faailoa le mea moni

.....

**ASO SA: 9 FEPUARI 2025**

**MATAUPU: UA MOLIA SATARAKA, MESAKO  
MA APETINIKO I LUMA O LE  
TUPU**

**SINI:** Ia malamalama le vasega, e sesē ma lē tonu le ifo i tupua, ua na’o le Atua soifua e ifo i ai tagata uma.

**TUSI FAITAU:** Tanielu 3:12-21

## **FESOASOANI MO FAIAOGA:**

O Sataraka, Mesako ma Apetiniko, e omai mai sa Iutā. Ua faasalaina nei tama, ona ua le usita’i i le faatonuga a le tupu, ina ia faapauu ma ifo uma tagata i le tupua auro, pe a iliina le pu. Na ifo uma tagata ae e le’i ifo ai tama nei e toatolu. O le latou le ususita’i i le faatonuga a le tupu, ua molia ai loa i latou.

Ua molia atu nei i latou i luma o le tupu o Nepukanesa, ma ua toe fai ai le faatonuga a le tupu i tama. O le a toe ili le pu, afai tou te le ifo atu i ai, o le a lafoina loa outou i le ogaumu aasa, pe mafai la e lo outou Atua ona ia lavea’i ia te outou.

Ae o le tali a tama nei, E mafai lava e lo latou Atua ona faasaoina i latou, ae e le mafai ona latou ifo atu i le tupua auro sa ia faia. Na faateleina ai le ita o le tupu, ma atili ai ona faa-aasa faafitu le ogaumu, ae lafoina loa i ai Sataraka, Mesako ma Apetiniko.

E le'i avea le aasa o le ogaumu, na faaalua ai le mana o le Atua o tama nei e toatolu, na mu auauna a le tupu na latou fusifusia ma lafo nei tama i le ogaumu, ona ua aasa tele le ogaumu, ae le'i mu tama i le afi.

O le faamanatu lea o le tatou tala i lenei taeao, na tutumau pea le loto toa ma le faatuatua o Sataraka, Mesako ma Apetiniko i lo latou Atua, lea na faasaoina mai ai i latou mai le faasalaga na faia e Nepukanesa mo i latou.

Ia tatou pei o tama sa Iutā nei le loto toa e tutumau ai i le talitonu ma faatuatua i le Atua, auā ua na o le Atua lava e fesoasoani mai ma laveaina le tagata mai ni faigata ma faafitauli o loo feagai ai i nei taimi o le ola a'oa'oina. Ia toa le loto e fai ai mea lelei ae aua le mimita, aua e leai lava sau mea aoga e maua ai.

### **Uiga o Upu:**

- i) poloa'iga - faatonuga malosi
- ii) tupua auro - faa-tagata auro

### **GALUEGA FAATINO- Taliga Fesili**

Tali mai fesili nei.

1. O ai igoa o tama e to'atolu o loo taua i le tala?

*Tali: Sataraka, Mesako ma Apetiniko*

2. O fea e omai ai nei tama?

*Tali: E omai mai sa Iutā*

3. O ai le igoa o le tupu e ona le faasalaga?

*Tali: Nepukanesa*

4. O le a le faasalaga o nei tama?

*Tali: Ua lafo i le ogaumu aasa*

5. O le a sau aoaoga fou ua maua mai le tala?

*Tali: Tumau i le faatuatua*

**PESE:** Pese ma Viiga 82

**A’OA’OGA:**

1. E faasaoina e le Atua le tagata talitonu faamaoni ia te Ia
2. Aua le saili masei e pei o le tupu
3. Aua le pala’ai i le mea sese.

.....

**ASO SA:** 16 FEPUARI 2025

**MATAUPU:** O LE ATALI’I UA SALAMŌ

**SINI:** Ia malamalama le vasega, e taua ma aoga le salamo, e toe aoatoa ai le fiafia o le loto.

**TUSI FAITAU:** Luka 15:11-24

**FESOASOANI MO FAIAOGA:**

O le mea sili lea ona aogā o le tala lenei. O le taimi ina ua lagona ai e le atalii lenei lona sese, ma toe fo’i ai e faatoese i lona tamā, ua salamo mai le so’ona fai o lona olaga talavou. Ua agasala o ia i luma o le Atua, ua agasala fo’i i luma o lona tamā, o lona lea manatu. O le a ia tula’i ma toe fo’i i le aiga. O lona manatu, ua le toe aogā ona toe ta’ua o ia o se atalii, ae ia ta’u o se auauna a lona tamā. Ua moni lava le upu, “O le aiga lava e atoa ai le fiafia o le tagata”.

O le toa ole loto e salamō, na toe mafaufau ai i lona aiga, o loo tele ai meaai, vaiinu ma tupe. O lea na ia toe faafou ai lona mafaufau, ae toe fo’i i lona aiga. E le’i toe faatali le tamā ina ua

ia iloa atu lona atalii sa leiloa, sa tamo'e, ua fusi, faaofu i le ofu tatapuvae aupito lelei, mama i lona lima, faasee i seevae fou, ua fasi foi le tama'i povi, ma fiafia ma olioli ai.

O se faamanatu foi lea mo i tatou uma i lenei taeao, o le salamō o le atalii ma toe foi i lona aiga, ia tatou faapei o lenei tama i lona loto toa e toe foi ai e faatoese i lona tamā, ae aua le faamaumau tupe pei ona ia faia muamua. Ia faamaulalo lou loto, pe a i ai se mea sese ua e faia, faatoese i matua aemaise o le Atua, e toe maua ai le malosi fou o lou tino, mafaufau ma lou agaga.

### **Upu ma Uiga:**

- i) Sena e - o le tamā
- ii) u'ii - pito i laitiiti o se fanau

### **GALUEGA FAATINO:** Sa'o pe Sesē

Tali fesili nei i le Sa'o poo le Sesē

1. O le tama matua na mana'o i lana vaega o le oa mai lona tamā. *Tali: Sesē*

2. O le tama laitiiti, ua aumai lana vaega o le oa, ona alu ai lea e tafao.

*Tali: Sa'o*

3. Sa tele ana tupe, sa tele foi ana uo.

*Tali: Sa'o*

4. Ina ua uma ana tupe, sa tele lava ana uo.

*Tali: Sesē*

5. Na faanoanoa le toeaina, ina ua toe fo'i mai lona atalii.

*Tali: Sesē*

**PESE:** O le aiga e maua ai le loto malie



Samoa o la'u fesili, po o le a ea sau tali  
E moni lava e faigofie, o fea ea le loto malie  
O nisi ua saili solo, i Samoa ma atunuu i fafo  
A ia e manatuaina, e te maua lava i lou aiga

Tali: Pagā lava le faigata  
Ona faamalieina  
E te fiu e saili solo  
Se mea e malie ai lou loto  
Le lalolagi matagofie  
O le aiga e maua ai le loto malie

## **A'OA'OGA**

1. Afai ua e sese, faamaulalo ma faatoese lou loto
2. Ia e alofa i lou aiga
3. Aua le mimitavale ma soona fai le ola

.....

**ASO SA: 23 FEPUARI 2025**

**MATAUPU: O LE VALAAUINA O SAMUELU**

**SINI:** Ia malamalama le vasega, o le faalogo  
lelei ma le usita'i, e faamanuia mai ai le  
Atua

**TUSI FAITAU:** 1 Samuelu 3:15-21

## **FESOASOANI MO FAIAOGA:**

E i ai atalii e to'alua o Eli, o Hofeni, ma Fineaso. O tagata  
ulavavale tele nei tama. Ua le ava ma le fefefe i le Atua  
I le amataga o le mataupu e 3, na valaau ai le Atua ia Samuelu,  
ae leiloa e le tama. O le valaau lona 2, na ta'u ai e le toaina o

Eli, lana tali e tatau ona fai. O le valaau lona 3, na fetalai ai loa le Atua ia Samuelu, e tusa o le agasala o loo faia e le fanau a Eli. I le tatou Tusi faitau o lenei taeao, (f 15-21) ua oo i le taeao, ua ala Eli ma valaau Samuelu, poo a upu na fetalai mai ai le Atua ia te ia? Na faamatala uma e le tama upu a le Atua ia Eli. Ae tali le toeaina o Eli, “Ia faia pea le finagalo o le Atua”

O le valaauina lea o Samuelu e le Atua, ina ia faaali atu ia Eli le mea sese o loo faia e ona atalii, auā e le o fai i ai le toeaina o Eli i lana fanau. Sa fefe Samuelu e ta’u ia Eli le fetalaiga a le Atua, ona o lona alofa ma faaaloalo ia Eli le ositaulaga sili. Ae na tautala lava Eli e faamalosi ia Samuelu, ina ia ta’u uma atu ia te ia le finagalo o le Atua.

O se tasi lenei o tamaitiiti ua mafai ona talanoa ma le Atua, ma faaali i ai e le Atua le mea e tatau ona fai. I le f19, ua faasolo ina tagata matua le tama o Samuelu, sa ia te ia le Alii, ua le mafai ia te ia ona iuvale sina ana upu.

O le tatou tala lea i lenei taeao, o le valaauina o Samuelu e le Atua, na amata mai lava i le galuega sa faia e lona tina o Hana, ua o faatasi ma le loto mauilalo o Samuelu, ina ia ofo atoa lona ola mo le Atua, e auauna ai ma fautua o se perofeta ia Isaraelu, e tusa o le finagalo o le Atua.

### **Uiga o Upu:**

- i) to - tatala faitotoa o le malumalu
- ii) Ta e - lo’u atalii e
- iii) tupu - ua faasolo ina matua

### **GALUEGA FAATINO: Taliga Fesili**

#### **Tali mai fesili nei.**

1. O 10im atua o Samuelu?  
Tali: Hana ma Elekana

2. Aisea na ofo ai e Hana lana tama mo le Atua?

Tali: Sa tauto ai Hana i le Atua

3. O ai atalii o Eli?

Tali: Hofeni ma Fineaso

4. O Samuelu o se perofeta faamoni. Sa'o pe Sese

Tali: Sa'o

**PESE:** Le Alofa o le Atua

**A'OA'OGA:**

1. Faamaoni i soo se valaauina

2. Faaali le mea moni

3. Talitonu faamaoni i le Atua

.....

**MANATU TA'IALA O MATI:**

**E MOOMIA LE TALITONU MA LE FAAMAONI**

O le ola talitonu, o le mea e patino i le filifiliga a le tagata lava ia. O loo moomia i mataupu o lenei masina, le loto o le tagata ua talitonu ma le faamaoni i le Atua, o Ia lava e fesoasoani mai ma tali mai. O le feau mo fanau ina ia mausalī le ola talitonu ia Iesu Keriso, o le Talalelei lea mo i latou.

**ASO SA:** 2 MATI 2025

**MATAUPU:** O IERIKO MA ONA PA

**SINI:** Ia malamalama tamaiti, o le mana o le Atua, na solo ai i lalo pa o Ieriko

**TUSI FAITAU:** Iosua 6:20-25

## **FESOSOANI MO FAIAOGA:**

I le tatou tala i lenei taeao, o le taimi lea ua uma ona sopoia le vaitafe o Ioritana e le faigamalaga a Isaraelu, ua taunuu atu i nisi o nuu e fou i le latou vaai. Na mafai e le Atua ona vaeluaina le vaitafe o Ioritana, e ala i le atolaau ma ositaulaga, ae sopoia e le fanauga a Isaraelu le vaitafe. O le mafuaaga tonu lea, na fefefe ma matata'u uma ai tupu ma tagata Amorī ma Kanana. O nuu ia o le a oo atu i ai le faigamalaga a Isaraelu.

Lea ua taunuu mai Ieriko, ua loka ma malu puipuia uma o latou pa, e si'omia ai lo latou nuu. E le mafai e se tagata ona toe sao atu i totonu. Toe fai fo'i e le Atua le isi vavega lea. E ono aso na savavali faataamilo ai Isaraelu i pa o Ieriko. Ae i le aso lona fitu, na faataamilo faafitu, ili pu e ositaulaga e to'afitu, ma alalaga leotetele tagata uma o le nuu.

Ua solofa uma ifo i lalo pa maualuluga na siomia ai le aai lenei o Ieriko. Ua faia uma foi upu na fetalai ai le Atua ia Iosua, ina ia faaumatia mea uma, tagata atoa ma manu. Ae tasi lava le fafine ma lona aiga na faasaoina. O ai le igoa o le fafine? Raava ma lona aiga, auā sa agalelei lenei fafine ese i tama Isaraelu e to'alua lea na muamua asiasi i le aai.

Faimai le tala, na faalogo loa Ieriko ua oo mai le malaga a Isaraelu, ona latou mumusu lea e faataga tagata Isaraelu e ulu atu i totonu o le laufanua. Ae peita'i, na faia e le Atua se vavega, ina ia talitonu ai nei tagata i le mamana o ana galuega.

O le talitonu foi lea o Raava i le Atua o Isaraelu, ua faasaoina ai lona aiga seia oo mai lava i nei ona po, ua avea ai i latou ma tagata nuu o Isaraelu.

O le tatou tala lea o lenei taeao, o le talitonu ma le faamaoni i le Atua, e mafaia ai soo se mea e faigata i le ola. Na faamoemoe lava Iosua i le Atua, i le taitaiga o le nuu ina ua mavae atu Mose. O le ala lea na faigofie ai le ulufale atu o Isaraelu i totonu o laufanua o Kanana.

**Uiga o Upu:**

- i)        fafine talitane -            e tele ona toalua

**GALUEGA FAATINO:** Faatumu Avanoa

Filifili le upu sa’o mo le fuaiupu

- 1)        Ua ili pu e \_\_\_\_\_, ae \_\_\_\_\_ le nuu ma le leotele (alalaga/ faitaulaga)
2.        Ona solo ai lea i lalo o \_\_\_\_\_ o Ieriko (fale/pa)
3.        Ona latou \_\_\_\_\_ ai lea o tagata ma manu uma (faaumatia/faasaoina)
4.        O Raava o le fafine \_\_\_\_\_ (Israelu/ nuu ese)
5.        Na o Raava ma lona aiga, na \_\_\_\_\_ (fasiotia/faasaoina)

**PESE:**            Solo i lalo pa o Ieriko

**A’OA’OGA:**

1.        Alofa atu i soo se tagata
2.        Ia talitonu ma faatuatua i le Atua
3.        E faigofie mea uma i le Atua

.....

**ASO SA:**            **9 MATI 2025**

**MATAUPU:**        **O SAMASONI MA TALILA**

**SINI:**                Ia malamalama le vasega, ole ola i tulafono a le Atua, e manuia ai

**TUSI FAITAU:**      Faamasino 16:1-21 (faiaoga)  
Faamasino 16:15-21 (mo le vasega)

## **FESOASOANI MO LE FAIAOGA:**

O Samasoni o le naseri a le Atua. O se tagata na foa'i ai e le Atua se malosi uiga ese, e leai ma se tagata e tusa ma ia. Na tuu ai foi e le Atua ni tulafono faa-naseri e ola ai, ae peita'i, e le'i usita'i ai Samasoni, ona ua fai lava lona loto i le mea ua mana'o ma fiafia ai. O lona malosi, na taumafai malosi ai alii sili ma tagata Filisitia e saili se auala e pu'eina ai Samasoni, ina ia fusifusia ma faasala ia te ia.

O Talila, o le toalua o Samasoni, o se fafine Filisitia. O se fafine o nuu ese, ae ua solia ai e Samasoni se tasi lea o tulafono faa naseri. E faasa ona faito'alua i se fafine o nuu ese. Na auala atu ia Talila le mana'o o alii sili o Filisitia, ina ia ta'u mai le mafuaaga e ala ai ona malosi Samasoni. Na ave e alii sili tupe siliva e 1,100 ma Talila, ma amata ai loa ona faaoleole Talila ia Samasoni, ina ia ta'u sa'o mai le mafuaaga o lona malosi.

E faatolu ona tauanau e Talila Samasoni, e pepelo lava i ai Samasoni, ona e le mavae ese lava lona malosi mai ia te ia. O le fa'afā o taumafaiga a Talila, na ta'u sa'o ai loa e Samasoni, le mafuaaga moni e mavae ese ai lona malosi. "E le'i oo lava se tafi i lo'u ulu, auā o a'u o le Naseri i le Atua mai lava i lo'u fanau mai. Afai e tafi lo'u ulu, ona alu ese ai lea o lo'u malosi".

O upu mulimuli lava ia na tautala ai Samasoni, ona ua alofa lona loto i le tauanau atu pea o Talila ia te ia. O le taimi lava fo'i lea, ua tuua ai e le Atua Samasoni, ona ua le usita'i. Ua mavae ese lona malosi uiga ese sa i ai, ua tutusa ma isi tagata uma. Ona pu'e loa lea o ia e Filisitia ma sali ese ona mata, ua avatu i le falepuipui.

O le iuga lea na oo ia Samasoni, ina ua le savali e tusa ma le finagalo o le Atua, ae ua fai lava lona loto. Faapea lava ia, e usita'i ia te ia le Atua, ae le iloa, o ia e tatau ona usita'i i le Atua. O le tatou tala lea o lenei taeao, o le alofa o le Atua ia Isaraelu, na ala ai ona ia tofia faapitoa Samasoni e fai ma naseri, ma foa'i i ai se malosi sili atu i soo se tagata, ina ia faaola ia Isaraelu mai ia Filistia. Ae peita'i, ua fai le loto o Samasoni. Ua ia le talitonu

ma le faamaoni i le Atua, ae ua ia faasili lona manatu faa le tagata.

### **Uiga o Upu:**

- i) naseri - tagata ua vavae ese mo le Atua
- ii) faaoleole - tauanau lava ia maua se mea ua mana’o ai
- iii) fuāfuati e fitu - fili e fitu o le lauulu
- iv) lāga - lalaga

### **GALUEGA FAATINO:** Taliga Fesili

#### **Tali mai fesili nei.**

1. Aisea na ese ai le malosi o Samasoni?

Tali: Ona o ia o le naseri a le Atua

2. E faafia ona tauanau e Talila Samasoni ina ia ta’u mai le mafuaaga o lona malosi?

Tali: E faatolu

3. E fia le tupe na totogi e alii ia Talila?

Tali: E 1,100 tupe siliva

4. Na faapefea ona alu ese le malosi sa ia Samasoni?

Tali: Ina ua tafi ese e Talila lona lauulu

**PESE:** O Samasoni o le toa

### **A’OA’OGA**

1. Faaaoga tatau lou malosi

2. Aua le seetia gofie i upu a isi

3. Ia talitonu faamaoni i le Atua

.....

**ASO SA:** 16 MATI 2025

**MATAUPU:** O IESU MO TAGATA UMA

**SINI:** Ia malamalama le vasega, o Iesu o Ia o le Faaola mo tagata uma

**TUSI FAITAU:** Ioane 4:49-54

### **FESOASOANI MO LE FAIAOGA:**

O le lona lua ai lea o faailoga na faia e Iesu i totonu o Kalilaia. O se tasi tamā sa i ai i le tausamiga na faia i Kana, lea na liua ai le suāvai e avea ma uaina. Ua ia faatoga ia Iesu, i lona atalii o loo ma’i i le fale. Na ona fetalai lava o Iesu, “Alu ia oe, ua ola lou atalii”, ona tuumuli ai lea o le tamā, ua alu i lona fale

O se tagata maualuga lona tulaga i totonu o le sosaiete o Kalilaia, aemaise totonu o le Lotu Iutaia, e malamalama ma talitonu i aoaoga a Iesu, ua mafua ai ona tupu lenei vavega ia te ia ma lona aiga.

E le’i oo atu i le fale, ae faafetaui mai e ana auauna, ua faapea mai, “Ua ola lou atalii”. Ua toe fesili le tamā, o le a le taimi na te’a ai lona ma’i? Na mavae lava ananafi i le ta o le tasi i le afiafi, o le tali lea a auauna. Ona ia talitonu ai lea, o le taimi tonu lava fo’i lea, na fetalai atu ai Iesu ia te ia, “Ua ola lou atalii”

O se tasi lenei o faailoga na faia e Iesu, na vave ona talitonu ai le toatele o tagata, e ala i le tau lava o le talitonu ma faatuatua e malolo ai. O se vavega na fai e aunoa ma se galuega tele na faia ai, tau lava o le fetalai a Iesu, ona malolo ai lea o lona atalii oloo ma’i i le fale.

Silafia lelei e Iesu le loto o lenei tamā, ua talitonu ma faatuatua ia Iesu, ina ia malolo lona atalii. Ua toatele tagata ua vave ona talitonu ia Iesu, o le tamā ma lona aiga, aemaise o ana auauna sa mau ma ia.



O le feau taua lea mo lenei taeao, o le faatuatua ma le talitonu faamaoni o lenei tamā ia Iesu, ua mafua ai ona toe ola lona atalii mai le ma’i sa maua ai o ia. O le mafuaaga foi lea na afio mai ai Iesu i le lalolagi, ina ia faaola i soo se tagata o loo fia maua se fesoasoani.

O lenei vaitau, tatou te le o toe vaai tino ia Iesu, ae o le aogā ia o tala a le Tusi Paia, sei tapena ai i tatou, i le tāua o le ola faatuatua ma talitonu ia Iesu, poo le a lava le ituaiga manaoga o loo tatou manana’o ai, e faia lava e Iesu, pe a tatou tatalo ma ta’u ia Iesu o tatou mana’o.

O Iesu o le faaola mo tagata uma, ae o le tagata e talitonu ma faatuatua i lona suafa, o le tagata lenei na te maua le manuia o Iesu. A’o le tagata e faamoemoe i lona malosi ma lona poto, e leai se iuga lelei na te maua.

## Uiga o Upu

i) faailoga – vavega na faia e Iesu

## GALUEGA FAATINO- Taliga Fesili

Tali mai fesili nei

1. O fea na ma’i ai le atalii o le tamā?

Tali: O le latou fale

2. Na faapefea ona faamalolo e Iesu le ma’i?

Tali: Na ona fetalai lava o Iesu, ona malolo ai lea

3. O le a le fetalaiga a Iesu?

Tali: “Alu ia oe, ua ola lou atalii”

4. O le a sou iloa, i le mafuaaga na malolo ai le atalii?

Tali: O le faatuatua ma le talitonu o le tamā ia Iesu

**PESE:** O Iesu o le vine moni

## **A’OA’OGA:**

1. Ia tatou faatuatua i le suafa o Iesu
2. E leai se mea e faigata ia Iesu

.....

**ASO SA: 23 MATI 2025**

**MATAUPU: O LE TAMA’ITA’I TAUSI MATUA**

**SINI:** Ia malamalama le vasega, e moni le alofa o Ruta ia Naomi.

**TUSI FAITAU:** Ruta 1:1-22 (mo le faiaoga)  
Ruta 1:16-22 (mo le vasega)

## **FESOASOANI MO FAIAOGA:**

O fea foi le nuu o Ruta? Ioe, Moapi. O le amataga lea o le mafutaga a Ruta ma Naomi. Na faiavā Maalona ma Kilionā le fanau tama a Elimeleka ma Naomi i fafine Moapi o Ruta ma Orepa. Na muamua maliu Elimeleka le tamā o le aiga, mulimuli ane maliliu fo’i Maalona ma Kilionā, ae totoe ai loa Naomi, Orepa ma Ruta. Ua toe ai o teine le aiga

Ona manatu lea o Naomi, o le a ia toe foi i Iuta, ae tuu le avanoa ia Orepa ma Ruta, e toe foi ai o la aiga i Moapi, e tausi o laua aiga o loo i ai. Ua tula’i i latou ma o atu i le ala e aga’i Iuta, ona faamanuia lea o Naomi ia Orepa ma Ruta, ua fetagisi i latou, ae ua le mafai lava le alolofa o fafine Moapi nei ia Naomi.

O le faalua na fetagisi o nei tinā e to’atolu, na faamavae ai loa Orepa, ma tuumuli ese atu ua toe foi i lona aiga i Moapi. Ae o Ruta, ua pipii atu pea lona loto ia Naomi. O upu nei a Ruta e faamaonia ai le moni o lona alofa ia Naomi. (f16-17) “O le mea e te alu ai, ou te alu ai foi; o le mea e te nofo ai, ou te nofo ai, e

fai lou nuu mo'u nuu; e fai lou Atua mo'u Atua; o le mea e te oti ai, ou te oti ai fo'i". Ua faaali manino le alofa tausī matua o Ruta ia Naomi.

E ui e le o sona tina moni lea, ae ua fai ma faataitaiga lelei tele lea mo i tatou uma i lenei taeao. E ui foi o se tala e masani ai le faalogo ma fai soo. Ae o le taua lea e faamanatu mai ai pea se a'oa'oga fou mo tatou uma, ina ia tatou fīafia e tausī i mātua ma tagata matutua, i totonu o o tatou aiga

## **GALUEGA FAATINO:** Taliga Fesili

### **Tali mai fesili nei.**

1. Aisea na malaga ai Naomi i Moapi?

Tali: Ua oge Peteleema

2. O ai le igoa o le toalua o Naomi?

Tali: Elimeleka

3. O ai igoa o le fanau tama a Naomi?

Tali: Maalona ma Kiona

4/ O fea le nuu o Naomi?

Tali: Peteleema

**PESE:** O Ruta o se teine lototele

### **A'OA'OGA:**

1. Ia alofa i soo se tagata

2. E manuia le tagata e tausī matua

3. E leai se mea e faigata i le Atua

.....

**ASO SA:** 30 MATI 2025

**MATAUPU:** O KAMUTA E TO'ALUA

**SINI:** Ia malamalama le vasega ia faaaoga tatau taleni ma le potu ua e maua

**TUSI FAITAU:** Mataio 7:24-27

### **FESOASOANI MO LE FAIAOGA:**

O le faaiuga lea o le lauga a Iesu i luga o le mauga, ua ia faatusaina ai le tagata ua faalogo i ai ma iloa, ma ola ai, ma le faalogo a le tagata ua faalogo ae le lagonaina, ua le ola ai. Ua ia faatusaina ai i ni kamuta fau fale e toalua.

O le kamuta muamua, ua faatusaina i ai le tagata potu, ua faia ma faavae lona fale i luga o le papa, ua oo mai aso leaga i timuga, tafega ma matagi, ua le paū lona fale. Aisea? Ioe, ua mau lelei, ma malosi le faavaeina o lona fale. O le faatusa lea o le tagata potu, ua faalogo ma usitai i aoaoga a Iesu pei ona ia a'oa'o mai e ala i lana lauga

O le kamuta lona lua, o le faatusa o le tagata valea, ua faavae lona fale i luga o le oneone, ua oo mai foi aso timuga, tafega ma matagi, ona pau ai lea o lona fale, ua nutipalaina lava. Aisea? Ioe, e vaivai le tulaga o loo faavae ai lona fale. E le malo ma lelei le faavae oloo tu ai lona fale.

O lenei vaitau i le tele o meaaoga ma feau e fai, e le lelei ai le faalogo a tatou i nisi o taimi, e faamuamua lava le mea oloo mana'o e fai, ae galo le feau e tatau ona fai. E faatāua lava e Iesu le faalogo ma le usitai, ia faamuamua ma o faatasi.

O le a se aogā mo i tatou i lenei taeao o kamuta nei e toalua? O fea le kamuta e te fīa faata'ita'i i ai? Ioe, leai ma se isi e fīa faataitai i si kamuta lona lua na fai lona fale i luga o le oneone.

O le faamanatu taua lea mo le tatou vasega.

E taua ai le faalogo, usitai ma fai loa. Ia talitonu ma malosi lou ola faatuatua ia Iesu, e manuia ma lelei ai lo tatou taumafai. Poo

le a lava se ituaiga faatonuga poo se feau e fai atu e fai, ia faalogo lelei, usitai ma fai loa. E uma loa ona fai, ona e fiafia lea, fiafia oe, ae sili le fiafia o le tagata e ona le faatonuga.

E lelei ona amata nei loa ona lelei lau faalogo, e oo ifo ina avea oe ma tagata matua, ua faigofie uma mea uma ia te oe. Ae aua le faavaivai ma fealoalofa'i, e leai ma se mea lelei e maua ai.

Ia fai le kamuta muamua ma faataitaiga lelei ia te i tatou uma i lenei aso, o le tagata na faalogo lelei i fetalaiga a Iesu, ma taumafai loa e ola ma faataitai ai i aso uma. E oo mai aso faigata o le olaga, ae ua mautu ma faalagolago ia Iesu lona ola, e maua ai le filemu ma le fiafia o lona loto.

### **GALUEGA FAATINO:** Tusiga Ata

Tufa pepa ma peni i tamaiti, e tusi mai ai le ata o lona fale o loo nofo ai.

**PESE:** Faalogo ma Usitai

### **A'OA'OGA:**

1. E taua le faalogo ma usitai e manuia ma fiafia ai
2. Ia fausia lou ola ia Iesu i aso uma.
3. Tuu ia Iesu o tatou mana'o.

.....

### **MANATU TA'IALA O APERILA:**

#### **IA FAI MA FAATA'ITA'IGA LELEI**

O le avea ma fa'ata'ita'iga lelei, o le tagata ua alo ese ma mea sesē ma mea leaga, ma ua faasili i lona loto lana amio ia lelei. O le upu ua masani ai, e iloa le tagata i lana tu ma lana tautala. O Iesu lava ia, o le fa'ata'ita'iga lelei lea mo le ola o soo se tagata i le amio ma le soifua fa'aogaina.

**ASO SA:**

**6 APERILA 2025**

**MATAUPU:**

**O IESU LE LEOLEO MAMOE  
LELEI**

**SINI:**

Ia malamalama le vasega, e tatau ona  
tatou faalogo ma usita'i ia Iesu

**TUSI FAITAU:**

(Faiaoga) Ioane 10:1-18

(Vasega) Ioane 10:11-16

### **FESOASOANI MO LE FAIAOGA:**

“O le Alii, o lo’u leoleo o mamoe o Ia, e leai se mea ou te mativa ai; na te ave a’u i le mea e i ai le vao mu’a ou te taoto ai” O ai e ana upu nei, ioe, o Tavita, Salamo e fia? Salamo 23:1-2. Ae o le a foi le tatou mataupu?

O Iesu e leoleo, a’o tatou mamoe. O le tatou Tusi faitau i lenei taeao, (f11) “O a’u le leoleo mamoe lelei. E tuu atu e le leoleo mamoe lelei lona ola mo mamoe” O nisi ia o fetalaiga tuusa’o a Iesu i ana aoaoga i le motu o tagata. Ua faaali manino ai e Iesu, o Ia o le leoleo maomoe sili ma lelei atoa, na te leoleoina le ola o tagata uma.

E lua ni ituaiga leoleo mamoe oloo taua i le Tusi faitau, o le leoleo mamoe o le tagata poo le auauna, ua alu e leoleo mamoe, ona sau ai lea o le luko, ua tulia mamoe ma faataapeape. O le a le mea ua tupu i le leoleo mamoe? Ioe, ua sola e su’e le mea e saogalemu ai lona ola, ae tia’i mamoe e tele a lona matai.

Ua fetalai Iesu, o Ia lava o le leoleo mamoe lelei, na te tuuina atoa mai lona ola mo ana mamoe. Le uiga lea o le leoleo mamoe lelei o Iesu. E le faapito i se tagata le alofa o Iesu, ae mo tagata uma. Poo fea lava e alu ai le mamoe, e taumulimuli ai lava Iesu e leoleo ma faola i soo se taimi.

Ua faatusa i tatou o mamoe, o le lafu mamoe a Iesu. E silafia uma foi e Iesu o tatou igoa (v3). Ua iloa lelei foi e mamoe le leo

o Iesu. Ae a le mamoe e le ui atu i le faitotoa, ae oso atu i se tasi mea, o le gaoi ma le faomea ia (v1)

O le fesootaiga faa-kerisiano lea o mamoe ma le leoleo mamoe lelei. O le tagata faatuatua ma Iesu Keriso. Ua aoaoina i tatou i le Talalelei ia Iesu, mai lava i lona soifua mai le fale povi i Peteleema, o ana aoaoga i taitai o le Lotu Iutaia, na iu ai lava ina fasiotia ma maliu, ae na toe soifua manumalo mai ai.

O le faamanatu lea o le tatou tala i lenei taeao, o i tatou o mamoe, ae o Iesu lava le leoleo mamoe sili. Na ofo atoa mai lava lona soifua, ina ia talitonu i ai tatou. Tatou taumafai e faataitai ona tatalo, toaga i le aoga aso Sa, toaga i le Lotu, e faalogo ai i tala ia Iesu, e manuia ai lo tatou ola i aso o i luma.

**GALUEGA FAATINO:** Faatumu avanoa

**Faatumu avanoa i le upu sa’o.**

1. O Iesu o le leoleo \_\_\_\_\_ lelei (mamoe/po)
2. E tuuina mai e le leoleo mamoe lona \_\_\_\_\_ mo ana mamoe (ola/tupe)
3. Ua vaai atu le auauna i le luko, ona \_\_\_\_\_ ai lea o ia (sola/malosi)
4. E iloa lelei e mamoe lo latou \_\_\_\_\_ (ta’ita’i/uo)
5. E i ai foi isi \_\_\_\_\_, e le o i totonu o le lotoā, e tatau ona aumai i totonu (mamoe/tagata)

**PESE:** Pese ma Viiga 345

**A’OA’OGA:**

1. O Iesu le leoleo mamoe sili
2. Faalogo ma usita’i i le Alii
3. E leoleo Iesu ia tatou uma

**ASO SA:** 13 APERILA 2025

**MATAUPU:** UA TI'ETI'E IESU I LE ASINI

**SINI:** Ia malamalama le vasega sa ti'eti'e Iesu i le asini a o afio atu i Ierusalem.

**TUSI FAITAU:** Mataio 21: 1 – 11

### **FESOASOANI MO FAIAOGA:**

O le tala lenei i le molimau a Mareko, o loo fa'aalia ai nisi o mea matagofie na tutupu, ao aga'i atu Iesu ma ona soo i Ierusalem. Muamua: O lona auina atu o ona soo e aumai le asini. E le o se asini a Iesu; e le o se asini matua foi, a o le tama'i asini e lei ti'eti'e ai se isi. Na o soo ma le faatonuga, a fesili ane se tasi, ona tali lea i ai, "E mana'o i ai le Alii." Ua taunuu lava mea uma e pei ona fetalai ai Iesu, ma na fa'aaogaina loa e Iesu le asini laititi, e le'i ti'eti'e ai se tasi, e tietie ai aga'i i totonu o Ierusalem.

Lua: O le alalaga o le motu o tagata. E toatele tagata ua faalogo i tala o Iesu, ma sa i ai foi nisi i a'oa'oga ma vavega a Iesu i Kalilaia. Ua tau fai o mai i le ala o loo afio atu ai Iesu ma ona soo, ua alalaga, "Faaola mai, Faaola mai; poo le "osana, osana". O lo latou manatu, ua oo i le taimi o le a faalia ai le pule a Iesu i Ierusalem ma amata ai lana faigamalo, e aveeseina ai le pule a Roma mai Ierusalem. E lilo ia i latou e le o le uiga lea o le afio mai o Iesu, e laga se toilalo ia Roma ma aveeseina mai Ierusalem ma Sa Iutā.

Tolu: O le fea'u tāua o le asini i lea paseka. O Iesu lava ia i lana feau na taumafai lava e faamasani ai i latou, ia faamasani e ola i le loto maualalo, o le agamalu, le ala o le loto faamagalalo, ma le ala o le faalelei o maseiga, ma e o loo latou sauaina i latou. Pau a lea o le auala latou te manumalo ai i o latou fili, o lo latou faamagalalo atu, ma ola i le loto maualalo. Aua le faafeto'aia le



leaga i le leaga, e atili ai na afaina i latou, a ia avea lo latou loto faamagalo, e fofoina ai le faafitauli o lo latou puleesea.

Fa: O le feau taua o le asini ma lona faaaogaina e Iesu. O le faaaogaina e Iesu o le asini, o le faailoga lea o lona loto maulalo, ma lona agamalu. I aoaoga a Iesu, o mea lava ia sa ia tautala i ai ma faamamafa, o le loto maulalo ma le agamalu. O iina e iloa ai le tagata o loo fesoota'i lelei ma iloa lelei le Atua ma lona finagalo paia mo tagata uma. E lei aumaia i tatou e Le Atua i le lalolagi tatou te ola fefinauai ma isi mo le pule ma le malosi faa le tino. E taua ma manaia nai manuia i le tino, peitai ia iloa, o le sini o le ola, o le malo e faavavau ma uiga o lea malo, e ao ona tatou ola ai ao tatou iai i lenei ola. O le mamanu tonu lea ma foliga paia o le Keriso, ia mamanu ai lo tatou ola, tatou te ola ai i le tino lenei. O foliga foi ia o le ola matagofie o le lagi, e vaaia i le ola nei, ia i latou ua taua o atalii ma afafine o le Atua silisili ese.

**GALUEGA FAATINO.** Fesili ma Tali.

FESILI:

1. Aisea na mana'o ai Iesu e tietie i le asini?
2. O le a le uiga loloto o loo i ai i le manu lea o le asini?
3. O le a la se feau o loo tau aumai e Iesu e ala i lona fa'aaogaina o le asini?

TALI:

1. Na ala na lē savali Iesu ae faaaoga le asini, ua faaali i ai e Iesu i luma o le motu o tagata, o le uiga moni lea o lona afio mai. O le agamalu ma le loto maulalo, o uiga ia o le malo o le Atua. O foliga foi ia o tagata e ola ai i lea malo e faavavau. Ma o le auala lea na mana'o Iesu e tali atu ai Sa Iutā i le malosi o Roma. Tali i le loto maulalo ma le loto faamagalo, aemaise foi o uiga ia o lenei manu o le asini.

2. O le uiga loloto o loo i ai i le manu lea o le asini, o se manu filemu, e agamalu ma le loto maulalo. E faatauva pe a faatusa atu i solofanua e tietie ai fitafita ma tagata maualuga. A o le asini e fai ma ave avega i tagata maualalo ma e lē tauoloa. O Iesu na fai ma taulaga e magalo ai agasala o e uma e talitonu o ia o le Faaola ma le Mesia.
3. E leai se isi auala e sili ona taua ia Iesu e soifua ai i le lalolagi lenei, nai loo le ala o le loto maulalo ma le agamalu. O le lalolagi o lenei vaitau, e leai a se eseese ma taimi o Iesu. E tauva tagata mo le mamalu ma le faaeaina. E finau mo le tamaoaiga ma le pule i isi tagata. O le mafuaaga lea e feteena’i ai ma lē fealofani tagata. O le malo o le Atua, o le lagi fou ma le lalolagi fou e le toe i ai se faafia sili ma se faa fia pule.

**PESE:** Osana pepese tagata uma (pese laupama)

**A’OA’OGA:**

1. Ua fai Iesu ma faaitaiga o le agamalu ma le loto maualalo.
2. Fiafia ma olioli auā ua afio mai le Tupu.
3. Aua le ola fia sili, ae ola i le agamalū.

.....

**ASO SA:** 20 APERILA 2025

**MATAUPU:** UA TOE TU IESU

**SINI:** Ia malamalama le vasega, ua fai Iesu ma faaitaiga o le ola fou i tala atu o le oti, mo e uma e talitonu ia te ia.

**TUSI FAITAU:** Mareko 16: 1 – 8

## FESOASOANI MO FAIAOGA.

O le molimau a Mareko, o le ulua'i molimau lava lea na tuufaatasi pe a fua i tala na tusitusia, mai tala sa feavea'i solo e le 'au Kerisiano, i le amataga o le ulua'i seneturi. E tuu sa'o lava le faamatalaga a Mareko, ma e le tele lava ni ana faamatalaga, ae sosolo lelei lava le tala, mai tina na sauni e o i le tuugamau, e pei o tu ma aga e masani ai, o le sauni e ave fuagalaau ma mea manogi. Peitai ina ua oo atu i le tuugamau, ua faate'ia i latou i le maa telē sa punitia ai le tuugamau, ua fulieseina. Ua ulu atu, ma iloa ai le tagata o loo ofu i le ofu tātapuvae. Ua fai atu le tagata ia i laua, "E le o iinei o ia a ua toe tu, ina matamata ia i le mea na latou tuuina ai o ia." Ua toe fai atu, ia latou o atu ma ta'u atu i ona soo.

E le o se mea ua tupu muamua lea mea. E leai se tagata e oti, ae toe ola mai lava i le lalolagi lenei e pei ona tatou masani i ai. O le mea lea sa matua faateia ai nai tina, e oo lava i le ausoo. E ui lava na latou faalogo o aoao ai Iesu, latou te le i manatu lava i se tulaga matautia faapenei, o le toe ola mai o se tagata na mautinoa na oti, ma ua moea foi i le tuugamau. E lei faigofie i le ausoo, ma e oo lava ia i tatou, e leai se mea faapea ua tupu, o le tanu o se isi ua maliu, ae toe ola mai. Ao le mea lava lea na oo ai ina faaali ai Iesu i le ausoo e faamaonia ai, e le o se agaga ia, ao le tino, toto, aano ma ivi.

O le tala lava lea na oo ina salalau, ma ua fai ma mea ua atili ai loa ona talitonu le toatele, ma liliu atu i le talitonuga ma le faatuatuaga i le faaolataga na faia e Iesu, ua toilalo ai le oti. O le folafolaga lava lea mo soo se tagata e ola i aoaoga a Iesu, ma talitonu i lona toe tu manumalo mai le oti.

I lo tatou talitonuga, tatou te toe tutu fo'i, i tala atu o le oti. O le oti, poo le a lava le auala e oti ai le tagata faatuatua ia Iesu, poo se faalavelave, poo se gasegase, o le a lava le auala e muta ai le ola, tatou te mautinoa, tatou te toe ola, e i ai foi o tatou tino fou i tala atu o le olaga lenei.

## **GALUEGA FAATINO:**Taaloga o le UMA ma le ALU PEA.

Faatonuga.

Tusi i ni pepa malō (card board) se lua upu nei o le OTI ma le Ola. Vaevae tutusa le vasega i ni vaega se lua. Nonofu mai vaega i ni laina se lua, ae faatutū i luga taitoatasi e tali mai i ni Fesili masani faa le tusipaia, ua saunia. Faamolemole, tapena e lau susuga ni fesili se lusefulu mai le Tusi Paia (General Knowledge level) Faataitaiga: E fīa aso na i ai Iona i le manava o le i'a? O le a foi le aai lea na alu iai Iona. O ai foi le tina o Samuelu? O ai foi le uso o Esau? O le a foi le isi igoa o Peniamina? E te iloa lava e lau susuga i le faiaoga fesili e iai si level faigata, ma fesili e mautinoa ua iloa uma e tamaiti. E fuafua i ai le tapenaga o fesili.

A sese, ua ave i le itu o le oti. A sa'o ua ave i le itu o le ola. E fai lava fesili ua saunia ina ia uma lelei sui o vaega na tali.

A mae'a ona alu lea o le vaega e lua, o le faaolaina mai lea o e oi le itu o le oti. O sui la o vaega o i le ola, na oi latou ia e mafai na o mai e tali fesili. A sese le tali, ua o ai ma latou i le oti. Ae a sa'o le tali, ona fai lea oi latou ma faaola i e o loo i le oti.

Ia toe faasolo lava iai fesili, seia oo ina iloa pe ola mai le vaega ALU PEA, pe tumau ai pea i le UMA.

O le vaega e toatele o e toe ola mai, o le vaega lena e manumalo. E mafai lava e le faiaoga ona fetuunai tulafono ma se isi faiga e faalelei atili ai le taaloga.

O le faamoemoe, ia tau latalata mafaufauga a le fanau i le mea e taua o le oti, ma le toe ola. Ia latou latalata ai foi i le uiga matagofie lea o le toe tu o Iesu, ua fai ai ma faaola i tagata uma e talitonu ia te ia ma lona toe soifua manumalo.

**PESE:** O Iesu lo'u Taeao fou

**A;OA;OGA:**

1. Ua fai Iesu ma faata'imuaga o le toe tu mai le oti, ma le ola e faavavau i e uma e talitonu ma faatuatua ia te Ia.
2. O le toetu o Keriso, o le faailoga o le manumalo mo le au Kerisiano uma.

.....

**ASO SA: 27 APERILA 2025**

**MATAUPU: O LE LEPELA SAMARIA**

**SINI:** Ia malamalama le vasega, e tatau ona faafo'i atu le faafetai i le mea lelei ua fai mai.

**TUSI FAITAU:** Luka 17: 11 – 19

### **FESOASOANI MO FAIAOGA.**

O le tala leni e pei o le molimau a Luka, ua aga'i atu Iesu i Ierusalem. O se taimi o le a fa'ailoa atu ai le atoatoaga o le uiga moni o lona afio mai, o lana feau, o ana aoaoga, ma le fa'aolataga ua ofoina mo soo se tagata.

O le ma'i lepela, e aafia ai fesootaiga masani o le tino ma le mafaufau (nerves), e le toe mafai ona lagona ai e le tagata se tiga ma e aafia ai le tino, ma aafia ai ma vaega e mānava ai le tagata. E oo ai lava ina faaleagaina le tino, ma papala ai sei tulou, ae matua lē lagonaina lava e le tagata. O se ma'i sa tasi a le faaiuga e fai ai i taimi o Iesu, o le aveese atu ma le aai o tagata, ae tuu i nofoaga tuufua e faatali oti ai, aua e le i i ai se auala e toagfitia ai.

E i ai le va o Sa Iutā (Judea) ma Samaria (Samaria) e lē fesoota'i ai ae feinoinoa'i ma feitaga'i, ona e manatu tagata Sa Iutā, o tagata Samaria e tupuga mai i tagata ese pei o Eleni ma isi atunuu na faatafea e Papelonia, ma aumaia e nonofo i eleele o Isaraelu pei ona i ai i na aso. O ni tagata e totolua poo ni afakasi, e le

Israelu moni i le toto. Lona uiga e eleelea ma leaga i le vaai a le Sa Iuta.

O le aga'i atu la o Iesu i Ierusalema, na o mai ai lepela e toasefulu, ma aioi mai ina ia faamalolo i latou. E faigofie lava le tali a Iesu. Ia latou o e fa'aali i latou i ositaulaga. Pau a lena. Na o le o lava. O le faatuatua e o ai, ma o iina lava e malolo ai ona o lo latou faatuatua. O le mafuaaga e fa'aali ai i latou, ia faamaonia e ositaulaga ua mamā ma faataga ona toe o atu i o latou aiga. O le Samaria, e le tapua'i i le tapuaiga a Iutaia, e ese le tapuaiga, ese foi ana ositaulaga. Masalo o le mea aupito i silisili lea na matua lagona ai le loto faafetai o le lepela Samaria, auā i lona lagona, e ese ia, ma sa ia talitonu e le a'afia ai ia i faamanuiaga o tagata Sa Iuta. Peita'i o lea ua faamaloloina o ia. Ua na lagona o le taimi lava na fetalai atu ai Iesu, na tafia ai le ma'i ma ua malolo. Na o ia lava, o le tagata e vaai mauualalo i ai tagata Sa Iuta, na ia matua amanaia le alofa o Iesu ua toe malolō ai.

## **GALUEGA FAATINO: FAATINO LE TALA**

Ia tofi ni tamaiti i tofiga nei latou te faatinoa mai ai le tala.

Iesu ma le ausoo e fua le numera I le aofai o le vasega. Lepela e to'a iva e lei loto faafetai

Lepela e toatasi mai Samaria. A le atoa foi, tau lava o nisi e fai ma Iesu ma le ausoo, nisi e fai ma lepela, Toatasi se isi e fai ma lepela samaria.

A mae'a loa le faatinoga, ona fai lea o le faatalatalanoaga.

O le ma'i lepela, e pei ona taua, o le vairusi e aafia ai nerves poo ala fesootai o le tino ma le mafaufau. E lē lagona ai se tiga o se itu tino e lavea pe afaina i se ma'i. O le mea lea e mafai a na faasolo papala ai le tino ae le lagona e le tagata. Leai se togafiti sa iai i taimi o Iesu. Mea lea sa faigata ai lea ma'i, ma na taua ole faama'i oti.

Tagata Samaria, o tagata e tupuga mai i tagata Eleni ma isi atunuu faapaupau, e inoino iai tagata Sa Iuta. O tagata sa aumai e Asuria, Papelonia ma Peresia, ua fenofoi ma nai tagata sa

totoe ai ao faatafea Isaraelu, ma ua tupuga mai ai tagata e totolua i atunuu eseese ia.

E mafua ona tāua, na o ia lava na ia lagona le telē o le fesoasoani a Iesu na ofoina mo ia. O se vavega e leai se isi e mafai ona faia mo i latou. O isi na ona manuia lava o ma le fiafia, ae galo atoa le mea taua na faia e Iesu.

Poo le a lava le inosia oi tatou e isi, e le avea lea ma mea e inosia ai i tatou ma vavaeeseina mai ai i tatou mai le alofa laveai a le Atua mo tagata uma.

**PESE:** E toasefulu lepela na o

**A’OA’OGA:**

1. Ia tatou manatua le loto faafetai i le Atua mo soo se mea ua tatou maua.
2. E lē faailoga tagata le alofa o Keriso.
3. Talitonu ia Iesu tatou te malōlō ai.

.....

**MANATU TA’IALA O ME:  
TALITONU MA LE FAAMAONI**

O le talitonu ma le faamaoni, ose uiga e tatau mo le tagata ua avea ma Kerisiano. Le tagata ua faamoemoe lona ola i le Atua, ma le tagata ua tasi lona ola, ua na o le Atua e fesoasoani ma alofa mai ia te ia. O le faafitauli o loo tupu, o le ola femoumoua’i o le tagata. E talitonu i le isi taimi, a o le isi taimi ua leai.

**ASO SA: 4 ME 2025**

**MATAUPU: O LE MAUOA LA’ITITI**

**SINI:** Ia malamalama le vasega, e tatau ona fai i tatou ma faataitaiga o le alofa faasoaso o le Atua i isi.

**TUSI FAITAU:** Mareko 10: 17 – 22

## **FESOASOANI MO FAIAOGA.**

O lea ua aga'i atu lava le malaga a Iesu i Ierusalem. E ui mai i Kalilaia ma nai aai ia e i le ala e aga'i atu i Ierusalem. Soo se aai lava e taunuu atu i ai Iesu, e lolofi atu i ai tagata o loo fia maua le fesoasoani. O le mataupu o lenei Aso Sa, o le oo ane o se alii talavou mauoa ma fesili atu ia Iesu pe faapefea ona ia maua le malo o le Atua.

O le alii talavou mauoa lea, ua tautino, ua uma na ia faatino tulafono uma. O lona uiga o ia o se tagata o loo ola ma le faamaoni i soo se ituaiga tulafono e pei ona a'oa'oina e le lotu Iutaia. E faalogologo atu Iesu, ua atamai ma iloa tulafono e tausi, atonu e tauloto i le ao ma le po, e fai ma tulafono o lona olaga o aso uma. E lē tele lava ni upu a Iesu i ai, ina ia alu e foa'i uma ana mea ma e matitiva ona fa'ato'ā sau lea ma mulimuli mai ia te Ia. O le fa'atinoga atoatoa lea o tulafono uma i upu a Iesu. O le alofa i le Atua, ma le alofa i lou uso ia pei o oe lava ia te oe... Ua tei lava ua solomuli le taule'ale'a ma toe alu ese. Na fesili ma le manatu e leai se mea o totoe na te faia, e maua ai le ola e faavavau. Tasi a le upu a Iesu, ina ia tago e faatino. Taia lava i lona loto lona tuinanau i lona tamaoaiga, leai se tali. E le faigofie ia te ia ona foa'i lona tamaoaiga. E le o se mea na faigofie na ia maua, pe oo foi i ai. Peitai i le tagata ua talitonu moni ma faatuatua i le Atua, e lē faigata, auā o lona faatuatua, e alu atu i le isi auala, ae toe faafoi mai e le Atua i se isi auala. Ua na o se tofotofoga o le alofa i le Atua pe moni pe leai. E tuu fesilisili le ausoo, ae na o Iesu ua na Ia iloa lelei le mafuaaga o le solomuli o si taule'ale'a, ona o le oa. Ua malosi lona piitaga i lona oa, nai loo le Atua. E le faigofie ona aga'i i le ola e faavavau se tagata ma ni ana oa, auā e vaeluaina lava lona loto ona o lona naunau i



le oa. E le faapea e lē taua le tamaoaiga ma le oa, ae taua foi le iloa lelei o le mea e faatulaga ai le oa. Tusa pe tele, ae a faamuamua ai le Atua, atonu e leai se afaina e auauna ai i le Atua ma lana galuega.

### **Uiga o upu:**

- i) mauoa - Lua upu o loo i ai, o le mau, o le tele (plenty, in excess), a o le oa (rich, wealth), o le tamaoaiga. Mauoa, o le tagata e tele ana tupe ma ana mea totino. Tele ina faapea tagata faipisinisi ona o mea latou te faagalueaina ma maua mai ai totogi. Poo tagata foi e fai a latou faatoaga, tele fanua, o mea totō ma lafu manu, o loo maua mai ai se vaega tupe

### **GALUEGA FAATINO: FAATINOGA**

Faamatala le tala i le gagana faigofie, ona faatino lea.

Mo le Fanau. Manaomia pepa e tusi mai ai tali a le fanau, e mafai foi ona tusi mai i api e uma fetufaai ai.

Faitau le tusi o Esoto e 20: 3 - 17, ma faavasega mai lea o tulafono e 10 i lalo o vaega tetele nei e lua i pepa ua tufa atu.

1. Alofa i le tagata. 2. Alofa i le Atua.

PESE:            Seek ye first the Kingdom of God  
                      Seek ye first the Kingdom of God,  
                      And His righteousness  
                      And all these things shall be added unto you  
                      Hallelu, Hallelujah  
                      Ask and it shall be given unto you  
                      Seek and ye shall find  
                      Knock and it shall be opened unto you  
                      Hallelu, Hallelujah

## **AOAOGA:**

1. Ia tatou iloa, e sili lava le Atua ma lona malo, nai loo se isi lava mea.
2. E lelei le mauoa, ae leaga pe a atua i le oa.
3. Alofa i e matitiva pe a tele ni au oloa.

.....

**ASO SA: 11 ME 2025**

**MATAUPU: O LE TINĀ ATAMAI (ASO O TINĀ)**

**SINI:** Ia malamalama le vaesga, o le atamai o le tinā ma lona faatuatua na manuia ai.

**TUSI FAITAU:** Mareko 5: 25 – 34

## **FESOASOANI MO FAIAOGA.**

O le tala lenei i se tinā ua tele tausaga o maua i le gasegase o le puna toto. I le tusi faitau, o loo agai atu faanatinati Iesu e faamalolo le afafine o Iairo le pule le sunako. E tau faavāvā atu Iesu i totonu o le motu o tagata o loo lolofi ane ia te ia, ao loo tau teteu atu e le ausoo tagata, ina ia sao atu Iesu. E faateia uma tagata i le tu faafuasei o Iesu ma fesili, poo ai na pa’i atu ia te ia. E toatele le motu o tagata o loo fetaomi mai ma naunau e pa’i mai ai Iesu. E tete’i ai le ausoo auā e toatele lava tagata o loo taumafai e pa’i mai ia Iesu, peitai ua aafia lava le Alii. O le mea lea ua sau ai le tinā, tautino ma faatoese mai ia Iesu, o ia. O ia na pa’i mai lava ma lona faatuatua, e malolo ai lava ia pe a tau a ina pa’i mai i se itu pa o le ofu o Iesu. Ua ia lagona foi ua ia mālōlō mai lona ma’i. Lea la ua oo ina faamanuia loa i ai Iesu ma ta’utino atu, o lona lava faatuatua ua ia malolo ai. O le mea moni, o le atamai o le fafine i lana fa’aiuga faa-le-faatuatua, tau lava ina pa’i i le ofu o Iesu, e faamaloloina ai o ia. O le faatuatua ua atagia ai lona atamai. Na alu mautinoa lava, e faamalolo ia pe a

ia na faia lea mea, ma o le mea lava lea na tupu. O le ma'i sa fai ma avega mamafa ma tele ai ona mafatiaga i le olaga o aso uma, na faafusei lava na alu ese. Na lagona e ia, ae na lagonaina foi e Iesu le alu ese atu o le malosiaga e malolo ai ma'i. O le sili o le atamai o le tinā o loo autu ai le tala o lenei Aso Sa o Tinā, o le sa'o o lē na alu i ai le tinā, ma le sa'o o le auala na ia fa'aaogaina, o le pa'i i le ofu o Iesu.

**GALUEGA FAATINO:** Fesili ma tali.

Ia tali mai e le fanau i a latou lava api, ona faafesuiyai lea ae togi mai tali e tusa ma tali sa'o o fesili nei.

1. O le a le igoa o le ma'i lea na maua ai si fafine.
2. O le a le mea na faia e le fafine na iloa ai lona faatuatua tele ia Iesu?
3. Faapu mai i ni au lava faaupuga lagona na i ai i le fafine ao ia alu atu ia Iesu?
4. Aisea na le fiafia ai le au soo i le fesili a Iesu poo ai na tago atu i lona ofu?
5. Na talosaga le fafine ia Iesu mo se fesoasoani ao lei faamaloloina?
6. Na faapefea ona faamaloloina le fafine mai lona ma'i?

Tuu iai le sefulu minute e fai mai ai le galuega lea, ona fesuia ai lea o api ae fefaasoai i le tali o ia fesili.

O Tali e fua i ai le fefaasoai ma le fanau.

1. O le puna toto.
2. Ua ia aapa atu ma pai i le pito o le ofu a Iesu ma lona talitonu e malolo ai.
3. Pau lava le mea, o lo'u pa'i i se pito o le ofu a Iesu, ou te malolo ai lava iina.
4. E toatele tagata na pai ia Iesu, ao lea e foliga e toatasi lava se tagata o loo saili moni lava ia Iesu.
5. E leai ma se talosaga. Na ona ia alu lava e tusa ma lona loto talitonu.

6. Ua alu atu faafuasei le mana mai ia Iesu, ona malolo ai loa lea o le tinā mai lona gasegase.

Mafaufauga Faatupu Manatu aua le faalateleina o le mataupu.

1. O le atamai (wisdom), o le iloa lea e faavae mai le matauina o mea e tutupu i le siosiomaga o soo se tagata. E fua i le ola ma mea ua masani ai le sosaiete o tagata (collective societal experience). O le potō (knowledge), o le iloa lea e aoaoina mai aoaoga eseese. A fua la i mea e lua, e mafai na fai mai le potō, e sesē e tusa ma le aoaoga na aoaoina ai (specific discipline), peita'i e sa'o i le fua faale atamai (experiential) i mea na tutupu muamua ma mea sa tutupu mai ai.
2. E ala na ta'ua se tinā e atamai, ona o ona uiga ma ana gaiioiga. A atamai, e le se tagata e soona faia se mea e aunoa ma lona mautinoa. E faavae mea uma na te faia i le olaga na ola mai ai. Faataitaiga mai ona tuua, ma isi o le aiga e matutua atu ia te ia.
3. Ua ta'ua le atamai o le tinā lea, ona o lona faatuatua ia Iesu. O se talitonuga e faavae mai i talitonuga, o tagata paia, e oo a i o latou lavalava poo mea latou te faaaogaina, e mamana ona o le tagata paia. O le ituaiga atamai lea o tuua na faaaoga e le tinā, na ia alu ai ia Iesu i lona talitonuga, tau lava ina pa'i i se pito o le ofu o Iesu, na te maua ai le faamalologa. Ma o lea lava na tupu le faamalologa. O le faailoga lena, e sa'o le atamai na ia faaaogaina. O le atamai o le faatuatua maumausali, i le mana o loo iai Iesu.
4. O le foliga tonu lava o le ituaiga atamai lea, o le tatou faatuatua i le Atua. Faatuatua tatou te aoaoina ai ana afioga, ma toaaga ai i le lotu ma aoaoina i tatou i ala o le malo o le Atua, ia tatou ola ai i le olaga lena, ma tuu atoatoa lo tatou faatuatua i le Atua, na te taitai ma na faia mea sili mo i tatou, i soo se taimi o lo tatou ola. O faailoga o lo tatou atamai, o lo tatou lava faatuatua ma lo

tatou talitonu atoatoa, i le faaolataga na saunia e Iesu mo  
i tatou, ua tatou maua ai le ola e faavavau.

**PESE:** Come into my heart Lord Jesus  
Come into my heart, O Lord Jesus,  
Come into my heart, I pray;  
My soul is so troubled and weary,  
Come into my heart, today.  
    Into my heart, into my heart,  
    Come into my heart, Lord Jesus;  
    Come in today, come in to stay,  
    Come into my heart, Lord Jesus.

Come into my heart, O Lord Jesus,  
I need Thee through life's dreary way;  
The burden of sin is so heavy,  
Come into my heart to stay.

Come into my heart, O Lord Jesus,  
Now cleanse and illumine my soul;  
Fill me with Thy Wonderful Spirit,  
Come in and take full control.

**A'OA'OGA:**

1. O mea tatou te faia i lo tatou faatuatua, e silafia lava e le Alii.
2. E talia i tatou e Iesu ina ua tatou talitonu ma le faamaoni.
3. Alu ia Iesu ma le loto talitonu, e manuia ai.

.....

**ASO SA: 18 Me 2025**

**MATAUPU: IA TUMAU LE TALITONU IA  
KERISO**

**SINI:** Ia malamalama le vasega, o le olioli i le Alii, o le tumau lava lea o le talitonu ia Keriso.

**TUSI FAITAU:** Filipi 4: 4 – 9

### **FESOASOANI MO FAIAOGA:**

O le malaga lona lua a le Aposetolo o Paulo na ui ane ai o ia i Filipi ma fa'atuina ai le ulua'i Ekalesia i Maketonia (Galuega 16) o loo i ai le manatu o le Tusi lenei a Filipi na tusia mai Roma, ma o loo aumaia ai le loto faafetai o le Aposetolo i le Ekalesia i Filipi ona o lo latou agalelei ma lo latou fesoasoani atu ia te ia. A silasila la i ai i le mataupu lenei e 4, o loo taoto ai iinei le loto faafetai o le aposetolo. Ua toetoe lava a faapea mai le aposetolo, o foliga o le faatuatua ma le loto talitonu, o le Olioli; "Ia outou olioli i le Alii e le aunoa, ou te toe fai atu, ia outou olioli." O ni upu e atagia ai se faatuatua ua matua maua'a lava. O le faatuatua ua fia le mau faafitauli ua ui mai ai ma iloa ai le alofa lavea'i o le Atua. E ui fo'i o loo i le falepuipui, e lē palaai ai le aposetolo, ae atili ai na olioli, auā i lona iloa mautinoa, o ona puapuaga ona o Keriso, o lona foi lea mautinoa o le ola e faavavau ma ua mautinoa lona faatalitali mai. O lona uiga, o le ituaiga talitonu lea, ua tatau ona ola ai soo se Kerisiano. O le foliga o le faatuatua e ui ina feagai ma tigā ogaoga, lamatia, ma sauaina, e tumau pea le olioli loloto, ona o le mautinoa o Keriso ma le ola e faavavau ua i ai. O Filipi na saisaitia ai Paulo ma Sila ma lafo i le falepuipui. Peitai e lē vaai Paulo i faafitauli, ae vaai i le matalasi o auala a le Alii na laveaiina ai i laua. Mo le Ekalesia i Filipi, o le manuia lea ua mautino e le Aposetolo; o le olioli, o le agamalu, ma le loto e talitonu ma le mautinoa i le Atua (absolute conviction). O le manuia o loo ta'ua e le aposetolo, e silisili i mea e manatu i ai, o manuia faa le lagi o le ola e faavavau e ola ai nei. A mautinoa mea uma ia, e faatauva mea uma o loo faasaga i ai le tagata i le olaga nei. O mea ua mamā, mea ua matagofie, mea ua logoleleia, ma soo se amio lelei, o le

faamaoniaga lena o le ola o loo tumau i lea manuia. E iloa uma ia mea i le olioli e vaaia i aso uma, i le tagata faatuatua.

**GALUEGA FAATINO:** Faatinoga

Taaloga matematega e faaalua ai le olioli i le au taaalo.

Tapenaga.

*Vaai ni pepa malo (cardboards) e tipitipi lelei i ni vaega laiti (squares) ma tusi ai i luga ituaiga upu eseese, soo se mea lava. Meaai, Sami, Atamu, Mose, Peteleema, Kirisimasi, Toetu. Vaevae le vasega i vaega e lua na tofi lea o le taitoalua e tulai i luga. Ona valaau lea e le faiaoga o upu taitasi ia ua tusi i pepa. E faasolo mai vaega ia ua tulai e aumai ni upu (hints) e fesootai ma upu ia ua lau atu. Faataitaiga, sami – vai, i’ a, matafaga, soo se mea e iloa e fesootai ma le upu. E tai sefulu sekone o le vaega. O le tagata e tele ana upu fesootai, ma vave lana tali, o ia lena e malo, ma e faaali mai lava e le faiaoga le ‘au ua malo. A mae’a uma le ‘au, o le ‘au e tele a latou togi o le ‘au lea ua malo.*

A mae’a le taaloga ona faatalanoa lea o le vasega. I le taimi na fai ai fesili, o a ni lagona na outou maua? Ae a la le taimi na ta’u atu ai ua e malo? Ae a le taimi ua malo le tou ‘au? Tuu se avanoa e aumai ai ni tali a le fanau.

E faaiu la i le faamatalaga faapea; Ia o le lagona o le olioli lena. O le lagona e sili atu i le fiafia aua ua matua sau i fafo le fiafia. O leo ma le ata ma le fiafia. Ao le taimi lava e te feagai ai ma se mea tiga, faanoanoa, le fia tautala, le fia fesootai atu i se isi, o le ituaiga taimi lena e taua ai le olioli o loo i totonu. E iloa i le toamalie ma le malosi e onosa’i ai.

Ia o le ituaiga olioli lea o loo faatatau i ai le tatou mataupu. O le olioli o le tagata ua atoatoa lona talitonu i le Atua, poo le a lava le mea e oo i ai le lalolagi, o a faigata, ia e tumau i lolioli, aua o oe o le tagata o le ola e faavavau e ala ia Iesu. Poo a lava faigata e tutupu ma tau faamata’u mai, soo se tagata lava e maua lona talitonu, e tumau pea lena olioli i lona loto, ma e fai ma ona malosiaga i soo se taimi ma soo se mea e iai.

Faatalatalanoaga o le mataupu:

Fesili faatupu manatu e faalautele ai le mataupu. Tuu le avanoa i le fanau e taumafai ona tali mai, ona faatoa avatu lea i ai i tali ia e fesoasoani ai e faalautele ai a latou tali.

1. O le a lea mea o le talitonu ia Keriso?

O le talitonu ia Iesu, o le iloa lea ua matua mauaa i lou loto, o Iesu o le Alo o le Atua na sau e lave'ai le lalolagi ina ia aua nei tatou paū atu i le malaia, a ia tatou ola i le ola e faavavau i le ola nei ma ona tala atu.

2. A tumau se mea o le a lona uiga?

O le tumau, o le mausali ma lē feseeta'i. O le mea lea e sili ona taua. E leai a se mea e tumau, i le lalolago lenei. Poo le a lava le iila, manaia, taugata, fai mai e anagata e le vave na leaga, e pala lava ma le aoga pe a tuai ma faaoga mo se taimi umi, o le lalolagi o mea e foliga e tumau, ae pala uma lava mea uma. Na o le Atua e tumau, e leai se gataaga. O le Atua foi la e maua ai le tumau ma le lē faagaetia o soo se tagata faatuatua.

3. Aisea e taua ai le olioli ia Paulo?

O le olioli ia Paulo, o le ola ma le mautinoa i le manuia o le Atua. O le manuia ua faaatoatoa i lo tatou faatuatua ma le talia o Iesu o lo tatou Faaola e toatasi. A atoatoa lo tatou faatuatua ma le talitonu, e agamalu, e loto maualalo, tatou te faia mea e tonu ma lelei e nanamu ma lotogamalie i le Atua. O mea foi tatou te faia ma le agalelei ma le alofa i isi, e faatupu faamoemoe ma atili faamalosia ai le olioli ma le faatuatua ia i latou.

4. O a la foliga o le talitonu e ao ona tatou ola ai ma fai ma faataitaiga i isi?

O foliga o le talitonu mo i tatou, o le olioli. O le fiafia e tupu pea i totonu o lou loto, ona o le alofa o le Atua mo i tatou i taimi



uma, ma le mautinoa, o loo i ai le Atua i soo se taimi ma soo se mea tatou te i ai, tusa lava foi poo feagai ma puapuaga.

Tauloto e faamauina. Filipi 4: 4 – “Ia outou olioli i le Alii e le aunoa, ou te toe fai atu, Ia outou olioli.”

**PESE:** Rejoice in the Lord always...

**A’OA’OGA:**

1. Ia fiafia e ola ia Keriso i aso uma.
2. E tatau i tagata uma ona tumau le talitonu ia Iesu Keriso.
3. A e popole i se mea, taofi ae tatalo i le Alii e maua ai le fiafia.

.....

**ASO SA:** 25 Me 2025

**MATAUPU:** O FA’AAMUIA MA FA’AMANUIA A IESU.

**SINI:** Ia malamalama le vasega, e manuia i tatou pe afai e faaamuia ma faamanuia mai ai Iesu.

**TUSI FAITAU:** Mataio 5: 1 – 12

**FESOASOANI MO FAIAOGA:**

O le lauga a Iesu i luga o le mauga, o se tuufaatasiga lea o nisi o uiga tausaaafia oi latou ua ola i le malo o le Atua. E le o ni tulafono e tau a’oa’oina, ao fua ia o le ola o le tagata o loo saili ia tumau i le Atua, ma ua ola i le lio o lana pule alofa fua ma lana pule amiotonu. O le fa’aamuia ma le fa’amanuia, o uiga e lua ia o loo afiafi i le upu Eleni o loo faaaogaina e Mataio; o le

*makarios*. O le upu lea o loo faaliliuina i le upu Peretania o le blessed, a’o le faasamoa i le upu “amuia”. O le tala lenei o loo i le vaega o le galuega tala’i a Iesu e amata mai i le mataupu e 3 o le evagelia a Mataio e oo i le mataupu e 7. O le mea moni, e le mafai na lava le avanoa e faamatala atoatoa ai vaega taitasi o le lauga, peitai e ao ina iloa, e fa’aamuia e Iesu le;

1. Matitiva i le agaga
2. Latou o loo faanoanoa
- 3 O ē loto maulalo
- 4 O ē fia aai ma fia inu i le amiotonu
- 5 O ē e alolofa atu
6. O ē e loto mama
7. O ē faatupuina le filemu
8. O ē sauaina ona o le amiotonu
9. O i latou o loo upu leagaina, faasauaina, tuuai pepeloina.

O le taunuuga o le lauga fa’aamuia lea, o le olioli ma le fiafia oi latou, o loo ola ai i ia uiga o le malo. Ua mautinoa lo latou manuia i le lagi i tala atu o le ola lenei. O le vaai a Iesu i le motu o tagata na o ane ia te ia, o tagata o loo aafia uma i nei mau faafitauli. Tagata ua manaomia lava se mapusaga i le tele o nei faigata. A o faigata e mafua mai lava i le loto maa’a, o i latou o loo mautofiga i le lotu, ma tulaga maualuluga o le sosaiete. Mea lea o loo avatu ai le feau a le Alii, afai e te mativa i le Agaga, ma e matuā moomia le Atua, amuia oe, auā e te maua lava. A e faanoanoa, e avatu e le Atua le faamafanafanaga. O ē loto maualalo, e faaumiumi lava lo latou ola; aua e fetaua’i a ma fetineia’i le au fia malolosi ma latou fano, a o e agamalu ma loto maualalo, e fai mo latou tofi le nuu. Toatele i latou e fia aai ma fia feinu, peita’i o le galala i le meaai o le agaga ma le amiotonu alofa o le Atua, e saunia mai ai e le Atua auala, e tali ai foi ma manaoga i le tino. O uiga uma ia, i le lagona o le Alii, e tatau ona lagonaina ai e tagata le malosi o le alofa o le Atua. O le pule alofa o le Atua, o lona malo foi lea, ma o le mea lea e ta’u manuiaina ai uiga ia ua fa’aamuia ai Iesu. O le manuia e sau mai

i totonu o le loto, ma a'afia ai le ola o le tagata faatuatua. O manuia tonu ia o le ola faalagolago ma le faamoemoe pea i le Atua i totonu o faigata.

**GALUEGA FAATINO:** Tusiga Parakarafa  
Filifili mai se vaega se tasi o uiga ia, e pei ona faaamuia i ai Iesu (lisi o loo avatu), ma tusi mai ai sau parakafa se tasi e faamatala mai ai le mea e ala ai ona manaia lea uiga ia te oe.

Lisi o uiga o le malo o le Atua.

1. Matitiva i le Agaga/ Ola e naunau i le Atua
2. Faanoanoa
3. Agamalu ma le loto maulalo
4. Fia aai ma fia inu i le amiotonu
5. Loto alofa atu i isi
6. O le loto mamā
7. Faatupuina o le filemu
8. Onosa'i i sauaga ona o le faia o le mea sa'o.
9. Onosa'i i le tuuaina fua ma le upu leagaina.

Faatatalanoaga o Fesili Faatupu manatu

1. O le faaamuia i le gagana lata mai, o se upu e faaviivii atu ai se isi i se tagata o loo iai se mea taua o loo moomoo atu iai. O le faamanuia, o le faasoia atu lea o manuia mai se tasi i le isi. I le upu *makarios* o loo faaliliuina mai ai le upu faaamuia, poo le blessed i le Tusi Paia faaperetania, o loo afifi ai uiga taua nei e lua. E faaamuia Iesu aua o uiga ia e iloa ai e o loo faalagolago i le alofa o le Atua. O manuia faa le lagi ia e faasoia mai e le Atua, ona o lo latou faamoemoe atu ia te ia. I se isi uiga, o ia upu, o se faamalosi a le Alii i tagata, e aua nei faanoanoa, ma aua nei taotaomia i latou i faigata, aua o lo latou feagai ma faigata, latou te maua ai meaalofa sili ia o le

malo o le Atua, latou te manumalo ai nai tofotofoga eseese, o loo luitauina ai i latou.

2. O le lauga lea ua taua, o le lauga faaamuia poo le beatitudes i le gagana faa-Peretania. Faatusaina e nisi e pei ni maataua ua sosoo faatasi e fausia ai se faasolo o manuia eseese o le malo o le Atua.
3. O faailoga o e o loo faaamuia i ai Iesu, oi latou ia o loo sulu atu i le Atua ma latou mafatiaga. O le faamoemoe i le Atua, e tupu ai le onosa'i; tupu ai le toafilemū e ui na le toafilemu le siosiomaga. O se toe faalototele lea a le Alii. Afai o loo e mativa i le Agaga, lona uiga na e te saili i le Alii. Sili atu lena nai loo le tagata o loo manatu ua atoatoa. O le ituaiga faauigaga lea e faigofie ona iloa ai e tagata, mea e ui iai i totonu o puapuaga o loo latou fetai. A siomia e fili, loto tele, onosa'i ma tumau i le loto maaa, ao e faalagolago i le Atua, e le tuua e le Atua.
4. O le feau taua o loo taoto ai iinei, o le pipii ma le tumau o lou faamoemoega i le Atua, poo le a lava le mea e aga iai le lalolagi. E le o ituaso filemu, ao taimi e fesouaina ai, e iloa gofie ai lava e o loo faamoemoe i le Atua; e iloa i o latou uiga nei na faaamuia iai Iesu. O uiga ia e iloa ai foliga o le tagata o le malo o le Atua. Upu e faataua i lenei aoaoga, o le toafilemu ma le loto maulalo.

5.

**PESE:** Will your anchor hold (Pe tumau lou taula)

Will your anchor hold in the storms of life?

When the clouds unfold their wings of strife?

When the strong tides lift, and the cables strain,

Will your anchor drift or firm remain?

We have an anchor that keeps the soul  
Stedfast and sure while the billows roll,  
Fastened to the Rock which cannot move,  
Grounded firm and deep in the Savior's love.

Poo tumau lou taula i taimi o afa  
A’o gasolo ao faatupu mala  
O peau o le sami ua tau fālo  
Poo tumau lou taula poo ua e mālō  
    Lo’u nei taula ia tutumau  
    Ia mausali i taimi o peau  
    Tumau i le papa lea ua mautu  
    Faavae faamaoni i le alofa o Iesu

**AOAOGA:**

1. E fa’aamuia Iesu ia i tatou, pe a tatou tumau ia te Ia i soo se taimi.
2. E faamanuia le Atua i le tagata e ola talitonu ia te Ia.

.....

**MANATU TAIALA O IUNI – FAALOGO MA USITA’I**

Ua a’oa’oina soo lo tatou ola i le “faalogo” ma le “usita’i”. Peita’i, e ese le to’atele o tagata latou te lē mafaia, ona o le faamaualuluga ma le fia iloa. O mataupu o lenei masina, o loo faamamafaina ai le tāua o le faalogo ma le usita’i, e taunuu i manuia ma le faaeaina.

**ASO SA:                   1 IUNI 2025**

**MATAUPU:               O LE ASO PENETEKOSO**

**SINI:**                    Ia malamalama le vasega, o le usita’i o le ausoo ia Iesu, na latou maua ai le meaalofo o le Agaga Paia.

**TUSI FAITAU:**       Galuega 1:4-8 & 2:1-8

**FESOASOANI MO FAIAOGA:**

O le Penetekoso o le aso lea ua faamanatuina ai le amataga o le ulua'i Ekalesia i Ierusalem, ina ua auina mai le Agaga Paia ma maua uma ai e le ausoo le malosi e amata ai le galuega tala'i, e pei ona amata mai e Iesu.

E pei ona ta'ua i le Galuega 1:8, le folafolaga a Iesu i ona so'o, e maua e i latou le mana, pe a afio ifo le Agaga Paia i luga ia te i latou, e fai ai i latou ma molimau ia Iesu Keriso, pe a tu'ua e Iesu la latou mafutaga.

Lea la ua amata lava le mataupu lenei e 2 o le tusi o Galuega i le fa'apea mai o le tusitala. "Ua o'o foi i le aso Penetekoso, sa i ai uma i latou i le mea e tasi ma le loto gatasi." O lona uiga, o lea ua potopoto fa'atasi le au so'o ma isi tagata i le mea e tasi ma le loto gatasi, e fa'atalitali le meaalofo lea na folafola atu e Iesu ia te'i latou.

O le a le meaalofo? O le Agaga Paia o le Atua. E ui lava ina ua ta'ua e Iesu le latou mafutaga ma ona so'o, ae ua talia lava e le au so'o i o latou loto le fetalaiga a Iesu, e fa'atali mo le afio ifo o le Agaga Paia. Ia lea la e pei ona va'aia le mea na tupu i lea aso, o le matagi ua agi tele mai ma ua tumu ai le fale uma sa i ai i latou.

O le upu matagi tamaiti i lona fa'aliliuina mai i le gagana Eperu, e tutusa ma le upu Agaga. O lona uiga o le matagi lea na agi malosi mai ma fa'atumuina ai le fale sa iai le au so'o, o le Agaga Paia lava lena o le Atua, e pei ona folafolaina mai e Iesu.

Ua iloa foi e i latou sa iai i lea taimi ma latou molimau i le mea na tupu, o laulaufaiva ua peisea'i o le afi, ua vaevaeina i luga o le au so'o, ma ua latou fa'alogu atu foi, ua tautatala mai le au so'o i gagana ese'ese, e ui o i latou uma o Iutaia. O lona uiga o le matagi, o le Agaga Paia lea o le Atua, ae o laulaufaiva afi, o gagana ia a le lalolagi ua tu'uina atu i le au so'o, latou te tala'i ai le Talaelele ia Iesu Keriso. O le vavega ua tupu, ina ua usita'i le au so'o i le faatonuga na tuuina ai e Iesu, ina ia aua lava nei tuua Ierusalem, ae faatali i le Agaga Paia o le Atua. Tamaiti, e ese le taua o le ola usita'i, aemaise lava i faatonuga a Iesu. O le tele o taimi tatou te faia ai fa'ai'uga sese, ma tatou pau'u atu ai i le agasala, ona ua tatou le faalogo ma usita'i i se faatonuga, a ua

fai lava o tataou loto. Manatua e outou le fanau, o le Agaga Paia o le Atua, e le sau fa'anatinati, ae malosi ma mata'utia lona pa'i mai i le loto o le tagata pe a o'o ina sau.

Ae a afio mai foi le Agaga Paia o le Atua e fa'atumu i tatou, tatou te lagonaina lava lo tatou mafanafana, ma e tutupu foi vavega i o tatou olaga. O le upu moni lava lea. E mafua ona lē tutupu ni vavega i o tatou olaga, ona ua tatou fa'amoemoe i lo tatou lava malosi ma le potu, ae ua tatou le tapa se fesoasoani mai o le Agaga Paia o le Atua, ma tatou fa'atalitali iai ma le onosa'i. Na mafai lava e le tatou uo o Iesu ona fa'atino mea uma lava na afio mai e fa'atino, e o'o lava i lona maliu. E tasi lava le mafuaaga, aua sa fa'alogu tasi ma usita'i i le fa'atonu mai o le Agaga Paia o le Atua. O le Agaga Paia lea na Ia maua ai le malosi, e fa'ataunu'u ai le fa'aolataga mo le lalolagi agasala.

### **GALUEGA FA'ATINO:** Taliga fesili

1. O le a le uiga o le Penetekoso?

Tali: O le afio ifo o le Agaga Paia o le Atua.

2. O le a le uiga o le upu matagi pe a fa'aliliuina mai le gagana Eperu?

Tali: O le Agaga.

3. Aisea e tatau ai ona tatou fa'atalitali i le Agaga Paia o le Atua?

Tali: Auā e maua ai lo tatou malosi.

4. E fa'apefea ona tutupu vavega i o tatou olaga?

Tali: E tutupu vavega pe tatou onosa'i ma fa'atalitali i le Agaga Paia o le Atua.

5. O le a sou lagona pe ana faapea e lē usita'i le au soo ia Iesu ina ia aua ne'i tuua Ierusalem?

Tali: Faasoa uma ai le vasega.

**PESE:** Spirit of the living God  
Spirit of the living God, fall a fresh on me  
Spirit of the Living God, fall a fresh on me  
Melt me, mold me, fill me, use me  
Spirit of the Living God, fall a fresh on me.

**A'OA'OGA:**

1. O le Agaga Paia, o le meaalofa mai le Atua mo tagata uma e faalogo ma talitonu ia te Ia.
2. E tutupu vavega i o tatou olaga pe a fa'atalitali i le Agaga Paia o le Atua.
3. E faia e le Atua mea sili mo i tatou pe a tatou usiusita'i ma onosa'i.

.....

**ASO SA: 8 IUNI 2025**

**MATAUPU: O FUA O LE AGAGA PAIA**

**SINI:** Ia malamalama le vasega, o le usitai ia Iesu ma ana poloaiga, e iloa ai uiga poo fua o le Agaga Paia i le olaga o soo se tasi.

**TUSI FAITAU:** Kalatia 5: 22 – 23

**FESOASOANI MO FAIAOGA:**

O le mataupu i lenei Aso Sa, o loo sailiili ai i foliga ma uiga o le tagata o loo ola i fua o le Agaga Paia o le Atua. E leai se tasi ua vaaia le Agaga ona e leai se tino. Peta'i e mafai ona iloa le Agaga Paia, i amio ma aga a le tagata o loo faatino ma ola ai i Aso ta'itasi.

I fua o le Agaga, e lelei pe a vaai pea i soo se laau, aemaise o laau aina e pei o moli ma mago. O fua e ola mai, o le taunuuga



lea o le ola o loo faasoasoa mai e le laau mai minerale mai le eleele, o le vai, ma le malamalama o le la. O loo i ai foi i le tuufaatasiga lea, le ea o loo siomia ma manava ina e le laau. O mea eseese uma ia, e i ai lo latou sao i le fua ua tupu mai, ma avea ma fua e manaia lona aano, e mafai na toe ola mai ai se isi laau, pe tauina foi ma faaaogaina e tagata. I le mataupu e pei ona sa faitauina, o loo aga'i tonu lava le Aposetolo i le eseesea o uiga o le tino, ma uiga o le agaga. O uiga o le tino, o loo i ai uma mea e feeseesea'i ai, e pei o le loto vale, o le feua'i, o le mana'o ma le losilosilo vale, o onaga ma poula. E le o ni uiga ia o e ua faaolaina e Keriso. O e ua lagona le taua o le faamagaloina ma le fanaufouina o o latou olaga, e atagia i o latou olaga le malamalama lea o Keriso. O fua o lea malamalama, o le agamalu, lotomaulalo, o le alofa le faatuaoia, o le alofa mutimutivale, o le agalelei, o le loto faamagalalo. O fua ia o le i ai o le Agaga o le Atua i le tagata i taimi uma. O uiga e iloa ma va'aia i soo se mea e i ai, ma mea e faatino. Manaia le lisi lea ua aumaia e Paulo, e fai ma taiala i soo se Kerisiano ua ola mo le Atua. Ia fai lea ma faatonu folau i le olaga o soo se tagata talitonu, ina ia susulu malosi mai ai le malamalama moni, o le alofa lavea'i o Keriso, e ala i e faatuatua ia te Ia.

### **GALUEGA FAATINO:** Tusiga Fuaiupu

Tusi mai ni fuaiupu e fa'aaoga ai fua o le Agaga e pei ona talanoaina i le mataupu.

1. alofa, 2. Olioli, 3. Filemu, 4. Onosai, 5. Mataalofa, 6. Agalelei, 7. Fa'amaoni, 8. Agamalu, 9. Ma le amio mamā.

Faatalatalanoaga o Fesili faatupu manatu.

1. O fua o loo taua i le manatu autu, o uiga ma amioga e iloa ma matauina i e o loo mafuta ma le Atua e ala i lona Agaga.

2. O fua o le Agaga o loo taua e le Aposetolo, o le alofa, o le olioli, o le filemu, o le onosa'i, o le mataalofa, o le agalelei, o le faamaoni, o le agamalu ma le amio mama.
3. Mo i tatou, o le mea lea e taua ai lo tatou iloa o a tatou uiga ma amioga e tatau lava ona tatou ola ai. O le toatele oi tatou e ola i fua o le agaga, o le malosi foi lena e tineia ai le malosiaga o le pouliuli, lea lava o loo filogia ai lo tatou lalolagi.

**PESE:** Pese ma Viiga 114

**A'OA'OGA:**

1. E tatau i tagata uma ona ola i fua o le Agaga.
2. Ola faapaiaina ma amio mamā, e finagalo ai Iesu mo i tatou uma.
3. Aua le amio matagā, e lē o fua ia o le Agaga.

**ASO SA:**

.....  
**15 IUNI 2025**

**MATAUPU:**

**IA USITA'I I LE AUAUNA A LE ATUA E SAOGALEMU AI**

**SINI:**

Ia malamalama le vasega, o le ola usita'i i e ua tofia e le Atua e tala'i lona finagalo e manuia ai le ola.

**TUSI FAITAU:**

Galuega 27: 1 – 26

**FESOASOANI MO FAIAOGA:**

O le tala sa faitauina, o le tala i le malaga mulimuli a Paulo le Aposetolo i Roma mo lana faamasinoga. Manatu e taua i le tala le apoapoa'i atu o le Aposetolo i le kapeteni o le Vaa sa malaga ai ina ia aua nei o latou tuua le mea e ta'ua o le "Ava Matagofie",

ona ua lata le taumalulu. Ua masani Paulo auā na afatia faatolu ma ua na ia iloa le uiga o tau ma mea e masani na aafia ai vaa. Peitai na fautuaina le kapeteni e nisi o lana auvaa ia latou taumafai atu i le isi taulaga o loo i tala atu o le Ava Matagofie. O le mea la na tupu, na maua le vaa i matagi ma le afā. Na oo ai lava ina lafoa'ina isi oloa i le sami. Ua oo ai foi ina le mafai na faasaoina le vaa, ma ua latou tuua uma ai le vaa ae taumafai ane i uta i le motu e ta'ua o Melita. Na fautua i ai Paulo ia latou aai ina ia malolosi, ma fai i ai Paulo, na ia maua le fa'aaliga i le po ma e leai se isi e afaina, vagana le vaa ma oloa e le mafai na faasaoina. Na oo lava ina taunuu mea uma na fai atu ai Paulo, ma latou mafai ona o ane i uta i le motu, ma tausia ai i latou e tagata o le motu. O le uiga lava lea e masani ai le ola o nisi tagata. E manatu o lona iloa ma lona poto i lona valaauina faapei o le kapeteni o le vaa, ona lē fia faalogo ai lea i se fautuaga mai le isi tagata. A o i foi tatou te iloa ai, o le tagata e lē fia faalogo i se fautua atu o le isi tagata, e feagai ma puapuaga, e afatia ma talepeina, faapei o le tala o lenei Aso Sa. Ae sili ai, o le tagata na aumaia le fautuaga, o le Aposetolo, o le faifeau, o le auauna a le Atua. O lona uiga, o le finagalo lava o le Atua e faailoa mai e ana auauna.

## **GALUEGA FAATINO:**

Taaloga e faatino ai le lelei o le faalogo ma le usita'i.

*SIMON SAYS. O le taaloga lenei e taaalo uma ai lava tamaiti. E fai le faatonuga, ae taumafai tamaiti e usita'i i ai. O le tulafono, a leai se Simon says i le amataga, lona uiga e le tatau na usitaia. O le tagata la e fai atu le faatonuga pei o le, tu i luga / stand up... ae tu i luga ua pe i le taaloga. Ua malamalama lava tamaiti i le faaperetania, ma e vave atu ma fesosoani foi i tamaiti nai faatonuga faigofie pei o le hands up/ simon say...hands up. Fai sina meaalofa mo le tamaititi e manumalo poo ni nai lole poo ni sukalati fo'i.*

*A uma na toe faamalamalama lea, o le mea na fai ai le taaloga, ina ia tatou iloa le taua o le faalogo lelei ma usitai i le faatonuga. O le fesootaiga ma le tala, o le talitonu ma le faatuatua i le tagata o loo faia le faatonuga, e saogalemu ai e pei o le tala, ma le mea e tupu i le taaloga.*

**PESE:** Trust and Obey. (A tumau ia Iesu)

When we walk with the Lord in the light of his word,  
What a glory he sheds on our way!  
While we do his good will, he abides with us still,  
And with all who will trust and obey.  
Trust and obey, for there's no other way  
To be happy in Jesus, but to trust and obey.  
Not a burden we bear, not a sorrow we share,  
But our toil he doth richly repay;  
Not a grief or a loss, not a frown or a cross,  
But is blest if we trust and obey.

**A'OA'OGA:**

1. O le faalogo ma usita'i, e taunuu i le lelei.
2. A puapuagatia, tatalo i le Atua.
3. O le faifeau, o le sui vaaia o le Atua i le lalolagi.

.....

**ASO SA:** 22 IUNI 2025

**MATAUPU:** O LE VALAAUINA O IEREMIA

**SINI:** Ia malamalama le vasega e tatau ona lagona ma usitai i le valaau mai o le Atua ia i tatou.

**TUSI FAITAU:** Ieremia 1: 4 – 10

**FESOASOANI MO FAIAOGA:**

O Ieremia o se perofeta a le Atua na valaauina i le taimi o le tupu o Iosia i sa Iuta. E le o tupu uma foi e usita'i i le Atua, peitai o Iosia le isi o tupu na naunau e toe lalaga le tapuaiga moni i le Atua, e ala lea i le toe faafouina o tulafono ma poloaiga. O ia foi na ia talepe i lalo fata faitaulaga ia Paala. Na valaauina la Ieremia i se taimi o le faafouina o le va tapuia o le nuu ma le Atua. Peitai na oo lava ina fesuia'i tupu ma oo ai ina faasolo mai tupu o Ioakina ma Setekaia, o ni tupu e matua le ava lava i le Atua. O Tupu ia na aga'i ai lava ina soloia Sa Iuta e Papelonia ma ave faapagota tagata. Mea lea e ta'ua ai Ieremia o le perofeta o loimata, leaga na loka si toaina e tupu lē mafaufau ma lē ava, ma oo ai lava ina faaumatia Sa Iuta e le Atua.

O Anatota o se nuu o ositaulaga, ma o iina e iloa ai le ituaiga olaga na fanau mai ai Ieremia. E amata mai i le taimi o se tupu e ava ma mata'u i le Atua, ae faaiu i tupu ifo i tupua ma le faamaualuluga. O le iloa o Ieremia ma le valaauina mai le manava o lona tina, o le faailoga lea o le tautinoga maumaututu a le Perofeta, na iloa lava lana galuega ao itiiti lava o ia, ma o lona valaauina lava lea. O lona lagona faatauvaa, o le tautinoga moni lava lea o soo se auauna moni a le Atua. O soo se tasi e faaali i ai le Atua mo le faia o lona finagalo, e lagona lava le matuitui ma le faigata o le feagai ma tagata e sili atu lo latou malolosi i le tamaoauga; peitai o le ta'utinoga foi lea a le Atua, o Ia na faia le gutu, o Ia foi na te fa'agaganaina lava lana auauna i upu na te faia ai lana galuega. Pau a le mea e fingalo i ai le Atua o le usitai ma alu. E tupu lava le atamai ma le gagana e fai ai le galuega i le taimi e moomia ai. Ioe le fanau, o le valaauina uma oi tatou, ia tatou aogā mo le Atua ma lona finagalo paia mo le lalolagi, poo le a lava le tofiga ma le taleni ma le agavaa, ia aoga mo le Atua ma lona malo.

**GALUEGA FAATINO:** Taaloga tauvalaau. Sei sei ponaivi

Mea e moomia. Pepa faatafafā e tusi ai igoa eseese e tai lua pepa e tusi ai le igoa e tasi. Polo, poo se isi mea e mafai na vave ona sei mai i luga pei se laau poo se isi a mea e mafai na faaoga (Baton etc)

Faatonuga:

Tusi ni igoa eseese i ni tamai fasi pepa tai lua i le igoa e tasi. Ia pea (pairs) lelei tamaiti e toalua ma le igoa e tasi; lona uiga e tofu paga. Faaitaiga o Iose. E lua tamaiti o le a ave iai le igoa Iose, tusa pe tama pe teine. Ia faafesagai pe 10 mita le mamao. ae tuu se polo, poo se isi lava mea, se laau ua saunia lelei (any object easily grasped) i le ogatotonu. Ona fai loa lea o le tauvaga poo ai e muamua tali mai i le igoa o loo ia te ia ma tamo'e mai e piki le polo poo se isi mea ua faaaogaina. E valaau igoa, ae tauva mai poo ai e sau e avatu le polo i lo latou itu. Faapena ona faasolosolo igoa. Aua nei i ai se faasologa, ae valaau i soo se faasologa ia taumafai ia fenumia'i ia aua nei faigofie na mate. Fesuisuia'i foi le leo, pe leotele, pe leo laititi foi e lu'i ai le faalogo ma le vave tali mai o le tamaititi.

O le aoga o le taaloga, ia iloa e tamaiti le taua o le faalogo ma le mataalia e vave ai ona gaiou i le valaau atu.

Faatalatalanoaga o Fesili faatupu manatu.

1. O Ieremia e pei ona aumai i le tusi na faitauina, o le atalii o Hilikia, o se fai taulaga mai le nuu o Anatota. O Anatota o se nuu itiiti lava pe a ma le tolu maila mai Ierusalem. O se nuu o ositaulaga o le ituaiga o Peniamina. O lona uiga, o Ieremia na ola mai i se aiga faa ositaulaga, faatusa i se atalii o se faifeau. O lana a'oa'oga ma lana taitaiga, o tu ma aga faa ositaulaga. E le taumate o se faamoemoe foi lea sa i ai mo ia, e sui tulaga i le galuega faa ositaulaga e pei o lona tama.
2. O le valaauina, i le mataupu leni, e faatatau i le valaauina faapitoa mo se galuega tau le Atua. Pei ona

valaau Iesu i ona soo e mulimuli atu ia te ia, e faapea foi le valaau a le Atua ia Ieremia. O le perofeta e le o se valaauina e faigofie, aua e fai ma avefeau a le Atua. Lona uiga e fesootai mai le Atua e ala i faaaliga ma miti eseese e unaina ai o ia e alu e faafesagai ma tagata o le nuu, poo tupu, alii ma faipule. Pei o se soo upu i le va o le Atua ma tagata. E ala na le faigofie, leaga i isi taimi, e fai si mamafa o le feau a le Atua e finagalo le Atua e ave, ae lamatia ai ma le ola o le avefeau.

3. Ia tatou iloa, ua valaauina uma lava i tatou e le Atua mo lona malo. Poo le a lava le siosiomaga e tutupu ma ola mai ai, e le na o le avefa ma faifeau e ofo atoa le ola, ao le fai ma tagata o le Ekalesia, faiaoga aso sa, autalavou, faasolo ai ina matutua, e lagonaina ai lava iina le musumusuga a le Atua i le auala o loo manao le Atua e faaogaina iai i tatou. E masani foi ona sau le valaauina oi tatou mai i tatou matua, o Faifeau ma taitai o le Ekalesia, tatou te naunau ai e ofoina atu i tatou i le galuega talai a le Atua.

**PESE:** I the Lord of sea and sky

**A’OA’OGA:**

1. E finagalo le Atua ina ia fai lo tatou ola mo ia ma ana feau.
2. Ofoina o tagata mo le Atua i soo se mea e finagalo i ai.
3. Faalogo ma usita’i i le Atua.

.....

**SO SA:** 29 IUNI 2025

**MATAUPU:** O ELIA MA PEROFETA A PAALA.

**SINI:** Ia malamalama le vasega, e leai se isi atua e sili atu nai lo le Atua soifua o loo tatou faatuatua iai.

**TUSI FAITAU:** 1 Tupu 18: 20 – 40

## **FESOASOANI MO FAIAOGA**

O Elia o le perofeta a le Atua. O le tala lea sa tatou faitauina i lenei taeao, o taulaga na faia e Elia le perofeta a le Atua ma perofeta a Paala e iloa ai poo ai le Atua moni.

Ua faapotopoto le fanauga a Isaraelu ma le perofeta i le mauga o Karamelu. Ua fai atu fo’i Elia ia te i latou, “Afa’i o le Alii le Atua ia, ia outou mulimuli atu ia te ia, ae afa’i o Paala ia faapena fo’i ona outou mulimuli atu ia te ia” Ua leai se tasi e tali atu ia Elia. Ua toe fai atu fo’i Elia i le nuu, ua toe lava o a’u le perofeta a le Atua o totoe, a o perofeta a Paaala e fa selau ma le toalimagafulu i latou. E ui i le toatele o perofeta a Paaala e le i faavaivai ai Elia ona o lona faatuatua i le Atua. Manatua fo’i le fanau o taulaga o le a tapenaina e Elia ma perofeta a Paaala e iloa ai poo ai le Atua e moni ma silisiliese. Ua tapena mea e fai ai taulaga, o povi e lua, o fafie ae leai se afi. Mautinoa lelei e Elia o le Atua lava e tali mai i le afi e faamu ai le taulaga o le Atua moni lena.

Ua amata le taulaga a perofeta a Paala, ua latou ave le povi, ma saunia le taulaga, ua latou valaau ia Paala lo latou atua, na amata i le taeao, ua oo atu i le tutonu o le la. Ua latou taulaga ma fai ane Paala e, faafofoga mai ia te i matou. Ae ua leai lava ma se leo e tali mai. Peita’i o Elia ua ia faapotopoto le nuu uma, ua ia teu le fata faitaulaga o le Alii, ua maea foi ona tapena mea uma mo le taulaga, ua aumai fo’i kate e fa ua tutumu i vai ma sasaa i luga o le taulaga, o luga o fafie ua tafe ifo fo’i le vai ma ua soo ai le fata faitaulaga. Ua oo i le itula e fai ai le taulaga, ona valaau lea o Elia le perofeta a le Atua. Ua faapea atu “Le Alii e, le Atua o Aperaamo ma Isaako ma Isaraelu ia faailoa i lenei aso, o oe o le Atua i Isaraelu. O a’u fo’i o lau auauna, ua faia nei mea uma



e tusa ma lau afioga. Ia e faafofoga mai mai i ate a’u, ina iloa e le nuu nei o oe le Alii o le Atua, ma ua e faaliliuina mai o latou loto.” Ua faafuase’i ona pau mai le afi a le Alii i le lagi ma faamuina ai le taulaga. Ua iloa e le nuu uma ona faapau faō ma faapea atu o le Alii o le Atua ia, o le Alii o le Atua ia.

Ioe le fanau, aua tatou te faalagolago pe faamoemoe i se malosi poo se isi lava mea. A ia tatou faalagolago i le Atua silisiliese e to’atasi na te faia mea sili mo lo tatou ola. Ia manatua e toatasi lava le Atua e moni ma faamaoni. E silisiliese o Ia i mea uma lava.

### **GALUEGA FAATINO: TUSIGA ATA**

Ia tusi sau ata e faamatalaina ai le vaaiga sa tupu i lea aso e pei ona faamatalaina i le mataupu.

**PESE:** O le Atua e tele

#### **AOAOGA:**

1. O le Atua e toatasi lava ia.
2. E ofoofogia vavega e faia e le Atua.
3. E moni ma faamaoni le Atua o loo tatou tapuai iai.

.....

### **MANATU TA’IALA O IULAI:**

#### **AUAUNA LELEI MA AOGA**

O upu e masani ai, o le ala i le pule o le tautua. O lona uiga o le auauna o le ala lena i le faaeaina. O le auauna e lelei ma faamaoni o lona tau i le faamanuiaina, aua e fiafia iai le Atua. Peita’i o le auauna e le lelei, le auauna e le faamaoni, e iai fo’i lona tau, o le feagai lea ma puapuaga o le ola. Ae o le auauna lelei ma aoga lea fetalai iai Iesu, ina ulufale faia maia i le fiafia o lou Alii

**ASO SA: 6 IULAI 2025**

**MATAUPU: O PAULO MA SILA I LE FALEPUIPUI**

**SINI:** Ia malamalama le vasega e leai se mea e faigata i le Atua, aua o Ia lava e faia vavega mo lana fanau faatuatua.

**TUSI FAITAU:** Galuega 16:25-34

**FESOASOANI MO FAIAOGA:**

E talanoa loa i le falepuipui, e faigofie na tau lo tatou mafaufau o le falepuipui o se nofoaga ua faapitoa mo tagata leaga. O tagata ua soli le tulafono ma faia nisi uiga le lelei e lamatia ai le saogalemu ma le nofo lelei o tagata lautele. O le nofoaga o le faalumaina ma le ola to'ilalo, e tusitusi lima iai tagata. O le nofoaga fo'i e fausia faapitoa ina aua lava ne'i mafai ona sosola mai ai i fafo pagota poo i latou ua ta'u salaina. E iai fo'i leoleo o loo galulue mo le leoleoina o lea nofoaga. Peitai tamaiti e iai fo'i tagata lelei o loo i le falepuipui ae ua mafua na oo i lea nofoaga ona o ni taupulepulega leaga a nisi uso a tagata. O nai tagata ua tuua'ifuaina, ua latou le maua se faamasinoga tonu. E faapena le tatou mataupu mai le tusi na faitauina, o le amataina o le galuega faalautele o le talalelei na tautiga ai Aposetolo e pei ona iai Paulo ma Sila.

Ua o ane Paulo ma Sila i le nofoaga e tatalo ai, ae ua fetai'a i ai ma le teine ua iai le aitu vavalo, ua ia maua oloa e tele faatasi ai ma ona alii i ana valoaga. Ua ia taumulimuli ia Paulo ma Sila ma taualaga "O auauna nei tagata a le Atua silisili ese, latou te tala'I atu ia te outou le ala o le faaolataga" Ua fai ma ona masani le tau alaga i aso e tele ma ua le fiafia ai le Aposetolo o Paulo ma ua ia tuli ai i fafo le aitu na ia te ia i le suafa o Iesu Keriso.

O le tuli i fafo o le aitu vavalo na i le teine, o se tulaga na matua le fiafia ai ona alii aua fo'i ua leai se faamoemoe na maua mai ai a latou oloa. Ua latou toso ia te i la'ua i le malae i luma o alii, ma ta'ita'i ia i laua i le faamasinoga ma molia ua le usita'i i la'ua

i tulafono o le malo o Roma. Ua o ane o tagata ma saei o la'ua ofu, ua sasa ma ua tuuina atu Paulo ma Sila i le falepuipui. Talofa ua aafia Paulo ma Sila ona o auala sese ma le ola taulamalama o isi uso a tagata ona ua le toe maua se tamaoaiga mai ala sese sa faamoemoe iai. Peitai e ui na feagai le au Aposetolo ma faigata, o le mea ua mautinoa, e le tulafoaina e le Atua lana fanau faatuatua. O le tulua o po ua pepese ma vivii ai Paulo ma Sila i le Atua, ona faafuase'i lea ona lulu le mafuie tele ma ua luluina ai faavae o le falepuipui, ua matala uma ai faitoto'a ma ua matala ai noanoataga uma. Ua ala le leoleo ua ia molimau i ia vaaiga ua fefe ma popole vale ua ia se'i fo'i le pelu o le a fasi o ia e ia ona ua ia manatu ua sosola e na noanoatia. Peita'i ua alaga Paulo ma faapea ane 'aua nei faia e oe se mea leaga ia te oe aua o loo iinei matou uma lava.

Tamaiti o lea fo'i aso na avea ai le na leoleo ma tagata ua talitonu ma faatuatua i le Atua. E leai se mea e faigata i le Atua. E saunia lava e Ia vavega mo lana fanau e faatuatua faamaoni ia te Ia. O le falepuipui ua avea ma nofoaga e faaolaina ai isi uso a tagata e pei ona iai le na leoleo ina le falepuipui. A tatou faamaoni i le Atua, o a faigata ma faafitauli e feagai ma lo tatou ola, na te le tuulafoaina i tatou.

### **GALUEGA:** Tali i le SA'O poo le SESE

1. O le tulua o po ma ao na pepese ai Paulo ma Sila i le Atua. (sa'o)
2. Ua luluina e Paulo ma Sila le falepuipui. (sese)
3. Ua matala faitotoa ua sosola e na noanoatia. (sese)

**PESE:** Faauta, faauta. (behold, behold)

### **A'OA'OGA:**

1. E fai vavega le Atua.
2. E laveai e le Atua lana fanau faatuatua.

3. Ia auauna i le Alii ma le faamaoni

.....

**ASO SA: 13 IULAI 2025**

**MATAUPU: O LE FAATUSATUSAINA O FOA'I.**

**SINI:** Ia malamalama le vasega e manuia le tagata e foai ana mea ma le loto malie.

**TUSI FAITAU:** Mareko 12:41-44

### **FESOASOANI MO FAIAOGA**

O le tatou mataupu o lenei taeao, o loo taua ai ni ituai tagata se toalua, o le mauoa ma le tagata mativa. O le mauoa, o le tagata e tele lona tamaoiga, ae o le mativa ua faasino i le tina ua oti lana tane, ua leai sona tulaga i le sosaiete, ua laiti foi oloa na te maua ia poo le leai lava o se mea.

Ao iai Iesu i le nofoaga e feagai ma le mea e teu ai tupe e pei ona taua i le tusi faitau, ua ia silafia tagata uma ma latou foai ua lafo. O le toatele fo'i, o tagata mauoa. Peitai o loo iai fo'i ma le fafine mativa ua ia lafo ana tupe iti e lua o le kotane e tasi ia. O le kotane o lona uiga o le tupe apa la'ititi. Ua silafia e Iesu mea uma lava, ona fetalai atu ai lea o ia te i latou ma ua faapea atu, E moni o mea a lena fafine mativa ua oti lana tane, ua lafo i le mea e teu ai tupe, ua sili o ia i ai latou uma. Ua latou lafo nisi mea mai ia latou mea e tele, a o ia ua mativa ua ia lafo ana mea uma sa ia te ia, o ana mea mea uma e ola ai.

Ua sili le foai a le tagata mativa, na i lo le foai a le tagata mauoa. O le mativa ua ave uma ana mea, ao le mauoa ua ave le isi vaega ae tuu le isi vaega. O a mea ua e ofo e foai mo le Atua, ia ave uma, aua e silafia e le Atua mea uma lava. Aua ne i o tatou toe vavaeseina se isi vaega mo i tatou. A ia foai uma ma le loto malie, aua o taulaga na e fia silasila mai ai le Atua.

Ioe le fanau, aua nei faapei i tatou o tagata mauoa sa taua i le tatou tala, ua ave le isi vaega o tupe ae tuu le isi vaega. A e sau foi ma lau sene i le Aoga Aso Sa, ia ave uma lau sene i le faiaoga. Ia foi ma lou loto fiafia aua e faamanuia mai ai le Atua ia te i tatou.

**GALUEGA FAATINO:** Faafetaui upu ma o latou uiga.

mauoa	←	→	fafine ua leai se toalua
kotane	←	→	le tauoloa
mativa	←	→	tele le tamaoaiga
fafine ua oti lana tane	←	→	tupe apa laititi

**PESE:** 152 (pese ma viiga)

**A'OA'OGA:**

1. Ia faia lau foi ma le loto atoa.
2. E silafia e le Atua mea uma lava.
3. E faamanuia le Atua i le tagata na te foi mea uma mo ia

.....

**ASO SA:** 20 IULAI 2025

**MATAUPU:** ALOFAGIA E LEONA.

**SINI:** Ia malamalama le vasega o le Atua na te laveaina le tagata e faatuatua ia te Ia.

**TUSI FAITAU:** Tanielu 6:16-24

**FESOASOANI MO FAIAOGA**

Tamaiti o ai ua vaai i se leona? O le manu lenei o le leona e le maua i Samoa, ae masani ona vaai ai tatou i le TV o se manu e taufeai ma e taua foi o le tupu o manu uma o le vao.

Ua uma ona filifili o alii sili uma o le malo, o faipule, ma tulafale ma e pule i nuu, ia latou faatuina se tulafono a le tupu. Ai se tasi e faatoga atu i se mea mai se isi atua, tau lava o le tupu e faatoga i ai. A maua o le a lafoai i le lua o leona. Ua iloa e Tanielu lenei tusi, ua alu o ia i lona fale ua tai foi faatolu i aso ona tootuli o ia ma tatalo ma faafetai i le Atua pei ona masani ai o ia.

Ua iloa e tagata o loo tatalo Tanielu i lona Atua, Ua latou tau atu i le tupu ma faapea atu, o lona Tanielu ua le ava o ia ia te oe le tupu e, ua le usitai foi i le vavao na e tusia. Ua latou ta'itaiina mai o Tanielu i le tupu, ma ua faapea atu le tupu, ina ia lafo loa i le lua o leona. Ua fai atu foi le tupu ia Tanielu, o lou Atua ua e auauna i ai e le aunoa o Ia na te laveaiina oe. Ua fo'i le tupu i lona maota, ona toe faatalise atu lea o ia i le lua o leona i le vaveao. Ua ia faapea atu ia Tanielu, "Tanielu e, le auauna a le Atua soifua, ua mafai ea e lou Atua ona laveaiina oe mai leona?" Ona tali mai lea o Tanielu, ia soifua oe le tupu e faavavau, Ua auina mai e le Atua lana agelu ua punitia ai gutu o leona. Ua matua fiafia lava le tupu ua ia faapea atu, ia aveaiina ae Tanielu ai le lua o leona, ua le afaina o ia, aua ua ia faatuatua i lona Atua. O i latou uma foi sa molia Tanielu i luma o le tupu, ua lafo ia te i latou ma a latou fanau ma a latou ava i le lua o leona.

Tamaiti poo a tofotofoga e oo mai ia te i tatou, a tumau lou ola faatuatua ma ia tatou toaga e tatalo ma le faamaoni i le Atua e laveaiina ma leoleoina lo tatou ola mai faigata ma puapuaga e feagai mai tatou. Ia manuia outou le fanau.

## **GALUEGA FAATINO: FATINOGA**

Ia faatino le tala sa faamatalaina. Ia faalapotopoto tamaiti e fai ma lua, ae vaai se tasi e fai ma Tanielu ma se isi e fai ma Tupu.

**PESE:** 245 (pese ma viiga)

### **A'OA'OGA:**

1. E le tuulafoaina e le Atua lana fanau faatuatua.
2. O le Atua e pule aoao i mea uma lava.

3. Ia tatou tutumau i le Atua.

.....

**ASO SA:** 27 IULAI 2025

**MATAUPU:** TOE FOI MAI I LE ALII E MANUIA AI.

**SINI:** Ia malamalama le vasega e manuia le tagata agasala e liliu ma fo'i i le valaau mai o le Alii.

**TUSI FAITAU:** Ioelu 2:12- 14

### **FESOASOANI MO FAIAOGA**

O le tatou mataupu o lenei taeao, o le leo faaperofeta o loo taualaga mo le nuu. O loo atagia i le valaau, foliga vaaia o le nuu o loo i ai. O le nuu ua lē iloa le Atua, ma ua ese le faamuamua, ua fiafia e fai le agasala ma ua tosina le nuu i tu ma aga faapaupau. O lea ua alaga Ioelu ma ta'u atu le finagalo o le Atua mo ona tagata. Ina ia foi mai i le Atua e manuia ai.

O Ioelu o le perofeta a le Atua i le malo o Iuta. O le taimi ua toe foi ane le faatagata-o-tauaina o Iuta e le malo o Papelonia. O lona uiga o taimi o le perofeta o Ioelu o taimi o le toe fuataina o le nuu ina ia salamo ma liliu mai i le Alii. O le naunau ina ia salamō mai ia latou mea leaga o loo faia, ae ia fo'i i le Atua e ala i le faia o mea lelei ma mea tonu e fiafia i ai le Atua. Talofa e tiga ona feagai Iuta ma faasalaga talu le o ese ma le Atua, e le uma lava le ola agasala. O le la ua folafola mai e le perofeta le oge tele o le a feagai ma le nuu. E oo lava i lafumanu e faaumatia uma, ma o le tau'i le na o lo latou ola fulitua i le Atua. O le ala lea o le taualaga o Ioelu ina ia foi mai i le Alii, auā e faigata le toasa o le Alii. E ta loa le taimi a le Alii o ai se mafai ona tu ma tete'e atu.

Peitai o fuaiupu sa faitauina, o loo manino ai le tuu avanoa o le Atua mo lana tagata. O lenei, ua faapea mai le Alii, “Ia outou toe foi mai ia te a’u ma o outou loto atoa, ma le anapogi, ma le fetagisi, ma le tagiaue. Ia outou saeia o outou loto, ae le o outou ofu ma toe foi i le Alii lo outou Atua auā e alofa fua ma alofa mutimutivale o ia, e telegese lona toasa, ua tele fo’i lona alofa, e salamō ia ona o le leaga”.

Ioe le fanau o le Atua o loo tatou auauna i ai o le Atua o le alofa, o le Atua e tuuavanoa ia te i tatou. E tele taimi tatou o ese ai ma le Atua ona o lo tatou ola agasala ae le mafai ona tuulafoaina i tatou e le Atua. Ia tatou foi i le Atua auā o Ia e alofa faamaoni ia te i tatou uma.

### **Upu ma Uiga:**

- i) saeia o outou loto – o le uiga o lea faaupuga, o le fa’aavanoaina po o letatalaina o le loto o le tagata. O le upu saeia, e fausia mai le upu sae. A sae pe sasae se ofu, o lona uiga ua tatala, pe aveese. Aveese le ola agasala e leaga.

### **GALUEGA FAATINO: TUSITUSIGA**

Tusi sau fuaiupu se tasi e faailoa ai lou loto faafetai i le Atua ona o lona tuuavanoa ia te oe.

**PESE:** Pa’i mai nei le Alii e

Pa’i mai nei, le Alii e, lou agaga  
Pa’i mai nei, le Alii e, o lou mana  
Tali: Pa’i mai nei, ia lē aunoa  
Ia saga pa’i faasoloatoa  
Pa’i mai, faatumu a’u i lou oa

**A’OA’OGA:**



1. Aua le ola agasala.
2. E tuuavanoa le Atua.
3. O le Atua o le alofa lava ia.

.....

**MANATU TA'IALA O AOKUSO:  
OLA I LE OLAGA FOU**

O le ola i se olaga fou, o lou alu ese lea mai i faiga tuai ua e manatu e le lelei mo oe. O le ola i se isi siosiomaga fou e le i masani muamua ai. Afai sa le faalogo ma usiata'i i matua, o le ola la i se olaga fou o le faalogo mausita'i aua e fiafia ai matua.

**ASO SA: 3 AOKUSO 2025**

**MATAUPU: O LE AMATAGA FOU**

**SINI:** Ia malamalama le vasega o le Atua e pule aoao i mea uma lava.

**TUSI FAITAU:** Kenese 8: 15-21

**FESOASOANI MO FAIAOGA:**

O le tatou mataupu o lenei taeao o loo faasino tonu i le taimi o Noa ina ua uma le lolo. O Noa o le tagata sa sa'o lana amio i luma o le Atua. O le tagata e faalogo ma usita'i i le Atua. Ua na o ia ma lona aiga sa faasaoina atoa ma manu sa i luga o le vaa. Ua uma le lolo ona fetalai lea o le Atua ina ia ulufafo, o ia ma lona toalua, o le la fanau ma o latou ava atoa ma manu uma sa i le vaa. Ua faamanuia i ai le Alii, ma ia uluola ma tumu ai le lalolagi uma. O le faamoemoe o le Atua, o Noa ma lona aiga, o le tupuaga fou lea o tagata i le lalolagi. E faapea foi i meaola uma na faasaoina, o le a tutupu mai ai nisi o meaola e faatumuina ai le lalolagi. O le amataga fou lea o le lalolagi, i tagata ma meaola uma na faasaoina i totonu o le vaa.

Ua ulufafo Noa ma i latou uma ua tuvae i le eleele matutu, ona faia ai lea e Noa o le taulaga faafetai i le Atua. Ua talia e le Atua le taulaga mu ma ua Ia lagona fo'i le manogi lelei.

E pule aoao lava le Atua i mea uma na ia faia, o le oo mai o le lolo ma faaumatia le lalolagi ona ua le iloa e tagata le Atua o le na foafoaina mea uma lava. Ua finagalo le Atua e faaumatia mea uma ae toe tapena se isi amataga fou mo lana fanau e iloa ona matata'u ia te Ia.

### **GALUEGA FAATINO: TA'ALOGA**

Tusi i ni fasi pepa ni faatonuga eseese, ona numinumi lea ma tuu i se atigipusa. Ia tofu le tamaititi ma lana fasi pepa e piki mai le atigipusa. Ia ta'ito'atasi ma tula'i e faatino le faatonuga, ae tuu i le vasega e mate poo le a le faatonuga, e fua i le faatinoga.

**PESE:** O ai na fau le vaa.

### **A'OA'OGA:**

1. Afai ua leaga, toe amata i le lelei.
2. I salamo ma foi i le Atua.
3. E faasaoina e le Atua oe pe a e lelei.

.....

**ASO SA:** 10 AOKUSO 2025 (Aso Sa o Tamā)

**MATAUPU:** O UIGA VAAIA O SE TAMĀ LELEI.

**SINI:** Ia malamalama le vasega e fiafia le Atua i le tagata e sa'o ma amiotonu.

**TUSI FAITAU:** Iopu 1:1-5

### **FESOASOANI MO FAIAOGA**

O ai se tamaititi na te ta'u mai, o le a le taua o le Aso Sa lenei? Ioe, o le aso Sa e faasino i tamā, e faamanatu ai lo latou sao taua.

O le aso fo’i tatou te ave ai le faafetai i le Atua ona o ni tamā lelei ua ia foai mo tatou.

I le tatou mataupu o lenei taeao, o le a faamatalaina le soifua faatuatua o lenei tamā o Iopu na ala ai ona ia maua faamanuiaga mai le Atua. E amata lava le tusi faitau i le faamatala mai e le tusi tala o Iopu ma lona tagata. “Sa i le nuu o Usa le tasi tagata, o lona igoa Iopu, ua sao le amio a lea tagata ma le amiotonu, sa mata’u foi o ia i le Atua ma aloalo ese i mea leaga.” O le soifua faatuatua lea o Iopu e afua ona ia toaga e tatalo, auā ua ia mautinoa e mafai e lana tatalo i le Atua ona faamagalalo ma leoleo i lana fanau. O foliga vaaia ia o se tamā lelei, e le gata e sao le amio ma amiotonu, e mata’u i le Atua ma alo ese i mea leaga, ae o le tagata fo’i e fiafia i le soifua tatalo ina ia manuia lana fanau.

Ioe le fanau o le aso lenei e faapitoa mo tamā, ia lagona io tatou loto le agaga faafetai ona o lo latou sao taua aemaise o galuega lelei uma o loo latou faatinoina mo tatou uma. O tamā fo’i o loo tatalo mo i tatou i aso uma ina ia tatou maua manuia mai i le Atua. Ia manuia le Aso Sa o tamā.

## **GALUEGA FAATINO: TUSITUSIGA**

Ia tusi sau solo e lua fuaiupu, e fa laina o le fuaiupu e tasi.

O le autu: *O lo’u tamā.*

**PESE:** A i ai Iesu i se tamā.

## **A’OA’OGA:**

1. E faamanuia le Atua i le tagata amiotonu.
2. E taua le soifua tatalo.
3. Ia avea i tatou ma tagata lelei.

.....

**ASO SA: 17 AOKUSO 2025.**

**MATAUPU:** O LE TAMĀ UA LILIU.

**SINI:** Ia malamalama le vasega o Iesu ma lona afio mai e mo tagata uma ina ia laveaina.

**TUSI FAITAU:** Luka 19: 1-10

**FESOASOANI MO FAIAOGA:**

O loo tatou tulimata’i pea le manatu aoao o lenei masina “Ola i se olaga fou” poo le suia mai i le olaga tuai e avea ma tagata fou. O le sui mai i le leaga e avea ma lelei ae le o le lelei e avea ma leaga. O le faamoemoe ia manumalo le malamalama i le pouliuli tusa ma le finagalo o Iesu.

Tamaiti o le tatou mataupu o lenei taeao, e faasino pe faa-autu i le tamaloa puupuu sa’asa’a e igoa ia Sakaio. O le tamaloa e tamaoiga lona aiga aua o lana galuega o ia o le ao lafoga sili. Ua masani Sakaio i le ao faasili o lafoga a nai tagata, ua oo lava i nai tagata lima vaivai ua oo iai faiga le alofa a lenei toeaina puupuu. Peita’i ina ua afio ane Iesu i Ieriko ua naunau Sakaio e fia matamata ia Iesu pe faapefea o ia, ae ua le mafai ona o le toatele o le motu o tagata, auā o le tagata saasaa o ia. O le ala lea o le a’e o Sakaio i luga o le laau e igoa o le sukamoru.

Ua silafia e Iesu Sakaio ona fetalai ane lea o ia, alu ifo ia oe i lalo, ta te mafuta ma oe i lou fale i le asō. Ua le fiafia le motu o tagata ona ua manatu e le tataua ona mafuta Iesu ma le taga agasala. Peita’i e le o le faamoemoe lea na Afio mai ai Iesu, Na Afio mai Iesu mo tagata uma. O le auai o Iesu i le aiga o Sakaio, o le avanoa ua faaolaina ai Sakaio ma lona auai atoā. Ua avea ai Sakaio ma tagata lelei ua fiafia iai Iesu. Ua tula’i Sakaio ma fai ane ia Iesu, o le a faasoa atu lona tamaoiga i e matitiva, o e foi sa ia ave ni a latou mea i se ala pepelo, o le a ia tau i ai ta’ifa. Ua suia le olaga tuai e avea ma olaga fou a tamaiti. O lea ua fetalai Iesu, ua oo mai le faaolataga i lou aiga i le asō.

O le tagata sa ta’u agasalaina e tagata, lea ua laveaina e Iesu, e avea ma tagata lelei e iloa ona alofa atu i isi tagata. Ia faapena

foi tatou le fanau. E finagalo le Atua ia avea i tatou o ni fanau lelei, ia tatou iloa ona ola faasoa i uso lima vaivai ina ia tatou maua foi le faaolataga e pei ona maua e Sakaio ma lona aiga.

**GALUEGA FAATINO:** Tusitusiga

Tusi sau solo, lua fuaiupu tai fa laina i le fuaiupu e tasi. Autu o le solo: “Sakaio le ao lafoga”.

**PESE:** Sakaio le tagata puupuu sa’asa’a

**A’OA’OGA:**

1. E alofa Iesu i tagata uma.
2. Ia iloa ona faasoa atu.
3. E liua e Iesu le tagata tuai e avea ma tagata fou.

.....

**ASO SA:** 24 AOKUSO 2025

**MATAUPU:** O LE POGISA O PATIMAIO.

**SINI:** Ia malamalama le vasega o Iesu e i ai le mana e faamalolo ai ma’i uma.

**TUSI FAITAU:** Mareko 10: 46-52

**FESOASOANI MO FAIAOGA:**

O loo faauau pea le malaga a Iesu ma lona ausoo e agai atu mo Ierusalem, o lea ua oo ane i le aai o Ieriko ae o loo nofonofono ai se toaina ua leva ona ia moomia se fesoasoani. O Patimaio lona igoa, o le tamaloa e po lana vaai, ia poo le tauaso fo’i. E ui i le faigata o le ma’i o loo feagai ma Patimaio, ae e le i avea lea ma ala e faavaivai ai, sa faatalitali pea ma le mautinoa, e iai se aso e tali ai lona mana’o.

E faamaonia lea tala pe a fua i le tatou tusi faitau, fai mai na ona faalogo lava o Patimaio o Iesu le Nasareta o loo iai faatasi ma le

motu o tagata, e le i toe faatali ae taualaga ma le leo tele ma faapea ane “Iesu e, le alo o Tavita, ia e alofa mai ia te a’u.” Ua vavao fo’i ia e tagata, ae ua le mafai ona vaoia o ia. Ua silafia o ia e Iesu ma ua faamalolo ia te ia. Ua fetalai Iesu, se a se mea ou te faia mo oe? Ua tali Patimaio ia Iesu “Raponi e, ia vaai o’u mata” ona fai ane lea o Iesu, “ina alu ia, o lou faatuatua ua e malolo ai.”

E ese le manaia o le tagata e faatalitali ma le faatuatua, o le tagata e onosa’i ma finau pea tusa poo le a le faigata. A lea ua tali le Atua, ma ua pupula ona mata. O le tauia o le ola tauivi ma le finau pea ma le faatuatua e i ai le taimi o le Atua e tali mai ai i o tatou mana’o. O tagata e to’atele ua molimau i le vavega ua faia e Iesu, ona tau faifo ai le o i latou. A o Patimaio ua pupula ona mata ma ua ia mulimuli o ia Iesu. O le pogisa o Patimaio, o Iesu lava o ia na faamalamalamaina. O le Atua faivavega na te tapena mea lelei mo lana tagata e iloa ona faatuatua faamaoni ia te ia.

Ioe le fanau, e leai a se isi tatou te sulufa’i i ai pe’a faapea ua maua tatou i ma’i poo ni faatauli fo’i o lenei olaga. Ua na o Iesu lava o ia o le tali o tatou manaoga uma lava pe afai tatou te faatuatua faamaoni ia te Ia.

## **GALUEGA FAATINO: FAATINO LE TALA**

Ia faatino le tala e pei ona faamatalaina i le tusi faitau. O Iesu, o le motu o tagata na taumafai e vavao ia Patimaio, ia faatasi ai ma Patimaio le tamaloa tauso.

**PESE:** O lima o Iesu o lima agalelei

## **A’OA’OGA:**

1. E leai se mea e faigata i le Atua.
2. E faafofoga le Atua i le i’u leo o le tagata faatuatua.
3. Ia avea i tatou ma tagata e mulimuli ia Iesu.

.....

**ASO SA: 31 AOKUSO 2025.**

**MATAUPU: O APERAAMO LE TAMĀ FAATUATUA.**

**SINI:** Ia malamalama le vasega e saunia e le Atua faamanuiaga mo le tagata e tumau lona faatuatua.

**TUSI FAITAU:** Kenese 22: 6-12

**FESOASOANI MO FAIAOGA:**

O Aperaamo o le tamā o le au faatuatua. Manaia la tatou mataupu o lenei taeao. A tatou talanoa loa i le upu faatuatua o lona uiga, o lo tatou talitonu i le Atua soifua. O le talitonu fo’i i mea e le o vaaia e o tatou mata.

O le toaina leni o Aperaamo o se tama e faatuatua ma talitonu faamaoni i le Atua. O lana avā o Sara, ma e to’atasi lo la alo, o lona igoa o Isaako. E pele tele ia Aperaamo lona atalii. I le tatou tusi faitau, fai mai ua tofotofoina e le Atua le faatuatua o Aperaamo pe faapei. Ua fetalai mai le Atua ia Aperaamo ia ave i lona atalii pele e toatasi e osi ai le taulaga. E le i faatali le tagata faatuatua i le Atua.

E ese le malosi o le faatuatua o lenei tamā a tamaiti! Na ona fetalai lava o le Atua, tu loa i luga Aperaamo ma tapena loa le faigamalaga. Ua faaee fafie, o le afi ma le polo, faatasi ai ma Isaako lona atalii. Ua alu le malaga ae ua fesili le tama i lona tama, po o fea se tamai mamoe e osi ai le taulaga mu. Faauta i le tagata faatuatua. Ua fai atu i lona atalii, “lo’u atalii e, e aumai lava e le Atua se tamai mamoe mana e osi ai le taulaga”. Ua oo i le nofoaga e osi ai le taulaga, ua ia fusifusi i lona atalii ma faaee i le fata. Ua aapa fo’i o ia i le polo o le a fasi oti ia te ia. Peita’i ua faafuase’i ona fetalai mai o le Atua “Aua nei oo lou lima i le tama, auā ua ou iloa nei ua e mata’u i le Atua.”

Tamaiti, oka se manaia o le tagata e tumau faatuatua ma talitonu faamaoni i le Atua. Auā e tapena ma saunia e le Atua mea sili mo ia. Ia fai Apeaamo ma faata'ita'iga o le tagata faatuatua mo i tatou uma.

**Upu ma uiga:**

i) polo – o le naifi po o le agaese.

**GALUEGA FAATINO: TALI FESILI**

1. O ai le igoa o le atalii o Aperaamo?
2. O le a le isi upu e tutusa ma le upu polo o loo taua i le tusi faitau?
3. Na oo le lima o Aperaamo i lona atalii?
4. Lisi mai mea na tapena e Aperaamo e osi ai le taulaga.
5. O le a se mafuaaga na fusifusi ai e Aperaamo lona atalii ma tuu i luga o le fata?

**PESE:** Faalogo ma usita'i

**A'OA'OGA:**

1. Ia faatuatua faamaoni i le Atua
2. E saunia e le Atua mea sili mo le tagata faatuatua.
3. E taua le faalogo ma usita'i.

.....

**MANATU TA'IALA O SETEMA MA OKETOPA:**

**FAAILOA ATU LE TALALELEI.**

Ua au tausaga le Talalelei i Samoa ma le lalolagi atoa. O le tala i le faaolataga e uiga ia Iesu Keriso ma le faaolataga na Ia tapena mo tagata uma. O le tala na tuu taliga ma taulogologo mai e nai tuaa ua mavae lea lava ua oo mai nei ona po. O le ata vaaia o lo latou soifua faatuatua faamaoni i le Atua ma le faamoemoe ia tutupu a'e fanau a Samoa ia mulimuli e faia le finagalo o le Atua ma ia faaauau ona faailoa ma tala'i atu le talalelei e uiga ia Iesu Keriso.



**ASO SA: 7 SETEMA 2025**

**MATAUPU: O LE POLOAIGA SILI A KERISO.**

**SINI:** Ia malamalama le vasega e finagalo le Atua e tala'i le Talalelei ina ia faaolaina le lalolagi uma.

**TUSI FAITAU:** Mataio 28:16-20

### **FESOASOANI MO FAIAOGA**

O le sauniga paia e ala i i le faamanatuga, poo le taliaina o le areto ma le uaina o le faatusa o le tino ma le toto o Iesu Keriso. O le tasi lea o poloaiga a Iesu na ia a'oa'o mai ai tatou ina ia faamanatu i aso uma. Lea e pei ona faamanatuina e le tatou Ekalesia i Aso Sa muamua uma o masina ta'itasi e pei fo'i o lenei Aso Sa.

O le Afio mai o Iesu i le lalolagi, na afio mai lava o ia o le auuana. Na mafuta faatasi ma le tagata agasala, na tusinga lima i ai tagata. E oo lava i ta'ita'i o lotu o latou lava sa taulamua e saili se auuala e fasioti ai Iesu. O faigata ia na feagai ma Iesu ae le i faavaivai sa faamalosi pea ina ia faaolaina le lalolagi. Na sasa ma faatigaina, na inosia ma amusia, na oo i le satauro ma le tuugamau. Peita'i na manumalo a'ia'i ai Iesu Keriso e ala i lona toe soifua manumalo.

A'o le i Afio Iesu i le lagi, o lea ua toe faatasi ma lona ausoo. Silafia lelei e Iesu e le faigofie le tuua ai o le mafutaga ma lona ausoo. Auā o lea e faatupulaia sauaga, e mautinoa fo'i e fusia le ausoo i le faavaivai. Peita'i o lea ua fetalai faamafanafana Iesu, e na te le tuulafoaina i latou e oo lava i le gataaga o le lalolagi. O le finagalo o Iesu, ina ia faalototele ma faamalosi i le ausoo, mo le galuega e ala i le tala'i atu o le Talalelei, ina ia soo ai le lalolagi uma. O loo fetalai manino le Alii o Iesu, ua tuuina atu ia te Ia le pule uma lava i le lagi ma le lalolagi. O lona uiga, ua ia Iesu Keriso le puleaao, ma e leai se mea e toe popole ai le tagata. O lona mana'o, ina ia o atu ia ma ia fai nuu uma lava ma

soo ma ia papatiso atu i le suafa o le Tamā, o le Atalii ma le Agaga Paia ma ia aoao atu ia te i latou ia tausi i mea uma. O le poloaiga sili lea a Iesu, i lona faamoemoe ia faaauau pea le talalelei ina ia maua e tagata uma o le lalolagi le ola e faavavau.

O le poloaiga a Iesu mo lona ausoo, o le poloaiga lava lea mo tatou uma le fanau, o lau sau i le aoga aso Sa i Aso Sa uma, o le faamoemoe ia aoaoina i tatou i le finagalo o le Atua ina mafai fo'i ona tatou o atu ma tala'i atu, le tala ia Iesu i isi fo'i a tatou uo.

**GALUEGA FAATINO: FAATINOGA.**

**PESE:** 371 (PESE MA VIIGA)

**A'OA'OGA:**

1. Ia fai i tatou ma soo faamaoni.
2. E le tuulafoaina i tatou e le Atua.
3. E pule aoao le Atua.

.....

**ASO SA:** 14 SETEMA 2025

**MATAUPU:** O LE FA'AMALOLOINA O AINEA MA TOREKA.

**SINI:** Ia malamalama le vasega o le fa'amaloloina o Ainea ma Toreka na liua ai tagata e fa'atuatua i le Alii.

**TUSI FAITAU:** Galuega 9:32-43

**FESOASOANI MO FAIA'OGA:**

O la tatou mataupu e fa'atatau lea ia 'Ainea ma Toreka o ni tagata sa fa'amaloloina e Peteru le so'o o Iesu, ma e i ai le taua tele o le faia o le fa'amalologa mo i la'ua nei, aua sa talitonu ai tagata na va'ai i ai ma fa'atuatua i le Alii. O le vaitaimi lea o le tala'iga o le Tala Lelei e pei ona galulue ai so'o o Iesu i lo latou vala'auina.

O 'Ainea o le tamaitiiti sa nofo i le nu'u o Lita, sa maua o ia i le mai supa, o le ma'i lea e pepē uma le tino. Sa ta'oto o ia i le umi e valu tausaga. Sa fai atu Peteru, "'Ainea e, ua fa'amaloloina oe e Iesu le Keriso; ina tu ia i luga, ma teu lou moega. Ona tu loa lea o ia i luga. Ua iloa atu foi o ia e tagata o lona nu'u ua liliu ai i latou i le Alii.

O Toreka o le fafine e igoa foi ia Tapita sa nofo i le nu'u o Iopa. E tele ana galuega lelei ma mea alofa na ia faia. Sa ma'i lenei fafine ma i'u ina oti ai o ia, ona fa'ata'oto lea i le afeafe aupitoaluga. E felata'i Lita ma Iopa, ua fa'alogo le au so'o ua i ai Peteru i Lita, ona latou 'a'au atu ai lea o tagata e to'alua ia te ia, ua ole atu aua le fa'atuai ona alu atu ia te i latou, o loo mana'omia vave se fesoasoani mai ia te ia, ona o Toreka poo Tapita ua oti.

Ona alu ai lea o Peteru i Iopa, a ua tutu mai fafine ua oti a latou tane o fetagisi mai, ma fa'aali mai ofu tino ma ofu tetele sa faia e Toreka ina o ia te i latou o ia. Ua tutuli atu i latou e Peteru i fafo, ona to'otuli lea o ia ma tatalo ma fa'apea atu i le oti: "Tapita e, ina tu ia i luga." Ua pupula ona mata ma ua iloa Peteru, ona nofo lea i luga.

Ona tago atu lea o Peteru i lona lima ma fa'atu ia te ia, ua vala'au atu foi i le 'au pa'ia ma fafine ua oti a latou tane, ua tu'u atu foi ia te ia ua ola. Ua iloa ai e Iopa uma lava; ua fa'atuatua foi tagata e to'atele i le Alii.

O le mea taua tele i le fa'amaloloina o 'Ainea i Lita, ona na liua ai tagata e fa'atuatua i le Alii. E fa'apena foi le toe fa'atuina o Toreka mai le oti i Iopa, ua fa'atuatua ai tagata Iopa e to'atele i le Alii.

E lelei le va'ai i mea silisili ma fa'amalologa ua faia e le au so'o o le Alii ma fa'atuatua ai loa, e pei ona molimauiina le

fa'amaloloina o 'Ainea atoa ma le toe fa'atuina mai o Toreka mai le oti, ma ua to'atele ai i latou ua talitonu ma fa'atuatua i le Tala Lelei ia Iesu Keriso le Fa'aola.

O le finagalo lea o le Alii Fa'aola o Iesu Keriso mo ona so'o, ina ia fa'amalolo atu i ma'i ma fa'atutu i e ua oti, ma ia molimauina e tagata ma talitonu ma liua ai i le Alii.

### **Uiga o Upu:**

- i) liua - talitonu ma fa'atuatua ma liliu i le Alii.
- ii) fa'amalologa - o le ave'eseina lea o se ma'i sa mafatia ai.
- iii) ma'i supa - le ma'i e pepē uma le tino ma le mafai ona gaioi.
- iv) 'a'au - auina atu, tutuli atu.

### **GALUEGA FA'ATINO:** Taliga fesili.

Tali fesili i le sa'o po'o le sese.

1. O 'Ainea na maua i le ma'i suka ma le toto maualuga.

*Tali: Sese*

2. Sa fa'amaloloina 'Ainea e le taulasea o lona nu'u o Lita.

*Tali: Sese*

3. O Toreka o Tapita lava lea e mai le nu'u o Iopa.

*Tali: Sa'o*

4. Na sau le fe'au ia Peteru mai Lita ina ia alu atu e fa'amalolo Toreka.

*Tali: Sese*

5. O le tatalo a Peteru i le Alii o Iesu na toe ola ai Tapita.

*Tali: Sa'o*

**PESE:** 165 (Pese ma Viiga) (last verse) Iesu e lau tatalo.

### **A'OA'OGA:**

1. E mai le Atua le fa'amalologa.
2. O le fa'atuatua e fa'afofoga mai ai le Atua.
3. O le tatalo e manuia ai.

.....

**ASO SA: 21 SETEMA 2025**

**MATAUPU: O LE ASIASIGA A LE TUPU O SE'EPA IA SOLOMONA**

**SINI:** Ia malamalama le vasega o le asiasiga a Se'epa, na ia ave ai oloa e tele, ma mea manogi mo Solomona.

**TUSI FAITAU:** 1 Tupu 10:10-13

**FESOASOANI MO FAIA'OGA:**

O le tala sa faitauina o lo'o fa'atatau lea i le asiasiga a le tupu fafine o Se'epa na alu atu ia Solomona le tupu o Isara'elu. Sa 'a'ave tala o le tamaoiga o le malo o Solomona, aemaise ai tala o lona potu ma lana fa'amasinoga i atunu'u tua'oi. O lea na ala ai le asiasi atu o le tupu fafine o le malo o Se'epa i lona fia va'ai ma molimauina. Sa matua fa'amaonia e le tupu fafine leni o Se'epa le tulaga ofoofogia ma le matalasi o le malo o Solomona, ma sa ia fa'apea ane ua itiiti mea sa fa'alogo i ai nai lo mea ua va'ai i ai. Ae e sili i le afa e le i fa'alogo i ai. Sa iloa lelei lava e le tupu fafine leni le tele o le tamaoiga o Solomona, ae na alu atu lava ma ana mea alofa o auro ma ma'ataua e tele, atoa ai ma mea manogi e le fa'atusalia le tele, mo le tupu o Solomona.

Sa tu'uina atu foi e Solomona mo leni tupu fafine o mea sa ia ole atu ai ia Solomona, atoa ma mea na foa'i atu e Solomona mai oloa a le tupu. Ona foi atu lea o le tupu fafine o Se'epa i lona

malo ma le loto malie. O mea uma foi sa ia mana’o ai ia Solomona, sa tu’uina atu i ai e Solomona o ia mea ma fa’aopoopo i ai ma isi mea e tele mai le oloa a le tupu.

### **Uiga o Upu:**

- i) ‘a’ave tala – a salalau ma tala’iina solo tala o se  
mea, lauiloa
- ii) tamaoaiga – ua tele ni ‘oa ma ni mea lelei.
- iii) tupu fafine – o se fafine ua ave ma tupu o se malo
- iv) asiasiga – o le alu atu e va’ai ma asiasi.
- v) Alemuka - o le itua’iga laau.

### **GALUEGA FA’ATINO: TALIGA FESILI**

#### **Tali mai i fesili nei.**

1. Aisea na asiasi mai ai le tupu fafine o Se’epa ia Solomona?  
*Tali: E fia molimau i le tamaoaiga ma le poto o Solomona ua ‘a’ave atu tala.*
2. O le a se tulaga o le malo o Solomona i lea vaitaimi?  
*Tali: Sa matua tamaoaiga ma mamalu ona o le poto na foa’i atu e le Atua ia te ia.*
3. O a mea alofa na avatu e le tupu o Se’epa mo Solomona?  
*Tali: O auro ma ma’ataua e tele, atoa foi ma mea manogi e le ma faitaulia le tele.*
4. O le a se tala a le tupu o Se’epa ina ua va’ai ia Solomona ma lona malo?

*Tali: Ua sili ona tele o mea ua ou va'ai i ai nai lo mea na tala'iina atu.*

**PESE:** 5 (Pese ma Viiga) Le Alii e le Atua e,

**A'OA'OGA:**

1. E taua le feasiasia'i ma fa'asoa meaalofa.
2. E sili le va'ai nai lo tala fa'alogu.
3. O le tamaoauga e maua mai le Atua

.....

**ASO SA:** 28 SETEMA 2025

**MATAUPU:** O PALA'AMO MA LANA ASINI  
TAUTALA

**SINI:** Ia malamalama le vasega o le tautala mai o le asini a Pala'amo na aumaia ai le fe'au a le Atua mo ia.

**TUSI FAITAU:** Numera 22: 21-35

**FESOASOANI MO FAIA'OGA:**

O le mataupu o lenei taeao o Pala'amo ma lana asini tautala. O le vaitaimi na tupu ai lenei mea ofoofogia o le tautala o le asini a Pala'amo, o le aga'i mai lea o le nu'u o Isara'elu e fa'amoemoe mo Kanana le nu'u na folafolaina. Fai mai ua fa'alogu le tupu o le malo o Moapi ma ona tagata, ua la'asia eleele laugatasi o Moapi e Isara'elu, ina ua uma lenei ona fa'ato'ilaloina e Isara'elu nu'u uma sa ui mai ai, o lea na auina atu ai le savali a Palako le atalii o Seporu le tupu o Moapi ia Pala'amo le perofeta ina ia sau e fetu'u Isara'elu, ona o le fefefe o Palako ma lona nu'u o Moapi. O le tali a Pala'amo e le mafai ona faia e ia o se mea, vagana ua

fetalai mai ai le Alii. Peita'i, na tauanau pea Palako ma i'u loa ina ti'eti'e Pala'amo i lana asini, ma aga'i atu loa ia Palako.

Ona to'asa ai lea o le Atua ia Pala'amo ma ua tu mai le agelu a le Atua e tete'e ma pupuni le auala, na iloa e le asini le agelu ua se'i lana pelu, ona alo 'ese ai lea o le asini ua ui atu i le vao, ona sasa ai lea e Pala'amo lana asini e fa'afoi i le ala. Ua tu mai le agelu i le va apiapi ona soso lea o le asini i le pito o le pa ma ua omia ai le vae o Pala'amo ma ua ia sasa le asini. Ua fa'apea lava ona le mafai le asini ona alu aua ua ia va'aia le agelu o tu mai le ala, ona ta'oto lea o le asini i lalo o Pala'amo. O le toe sasa atu e Pala'amo o le asini na tautala mai ai loa le asini ma fa'apea mai, Se a se mea ua ou faia ia te oe ua e sasa fa'atolu mai ai ia te a'u? Fai atu Pala'amo ona ua e fa'aonoona ia te a'u, ana i lo'u lima se pelu po ua ou fasimatea oe. Ona fai atu lea o le asini, E le o lau asini ea a'u nei, ua e ti'eti'e ai talu ona e maua o a'u ua o'o mai i le aso nei? O la'u masani ea ona fai fa'apea ia te oe? Ona fa'apea atu lea o ia, E leai lava.

Fai mai, ona fa'apupulaina lea e le Alii o mata o Pala'amo ona iloa ai lea e ia o le agelu a le Alii o lo'o tu i le ala, ua i lona lima lana pelu ua se'i, ona ifo ai lea o ia ua fa'apa'ufao.

Ona fai mai lea o le agelu a le Alii ia te ia, na ou sau e tete'e atu ia te oe ona ua leaga le mea ua e faia. Se a ua e sasa fa'atolu ai lau asini? Na iloa fa'atolu mai a'u e lau asini ma 'alo ese, semanu ua ou fasiotia oe ae fa'asao ia te ia.

Ioe vasega feoloolo, pe ana le mafai ona tautala le aini, e mautinoa lava e oti Pala'amo. Ae o le asini o le 'avefe'au taua tele ua le fasiotia ai lona matai. E to'atele nisi e sauaina a latou fagafao po'o ni ta'ifau aoga.

Ae ua a'oa'o mai lenei tala, e mafai ona fa'aaogaina e le Atua manu pei o le asini po'o nisi foi fagafao e fesoasoani mo i tatou pe afai ua tatou le lagona lona fetalai ma lona fa'aali mai.

## Uiga o Upu:

- i) fetuu – folafola ni mala
- ii) va apiapi – va itiiti



- iii) fa'apupulaina – fa'ava'ai/fa'amanino/fa'ailoa
- iv) fa'apa'ufaō – fa'apa'u ma ifo

**GALUEGA FA'ATINO: TALIGA FESILI.**

Tali i fesili.

1. O le a se tala na fa'alogo ai Palako ma Moapi e uiga ia Isara'elu?  
*Tali: Ua fa'ato'ilaloina e Isara'elu o nu'u uma na latou ui mai ai.*
2. O le a le mana'oga o Palako le tupu o Moapi na ta'u atu ia Pala'amo?  
*Tali: Ina ia fetu'u e Pala'amo le nu'u o Isara'elu.*
3. O le a le tali a Pala'amo i le mana'o o Palako?  
*Tali: E le mafai ona ia fetu'uina le nu'u ua fa'amanuia e le Atua.*
4. O a upu a le asini na tautala ai ia Pala'amo?  
*Tali: "Aisea ua e sasa fa'atolu mai ai ia te a'u? Ana ou le alo, semanu e fasia oe e le agelu i lana pelu".*
5. Aisea na tautala ai le asini a Pala'amo?  
*Tali: Aua ua fa'aali mai le Atua ae le iloa e Pala'amo.*

**PESE:** 7 verses 1& 2) Mamao mamao lou nofoalii Le Alii e.

**A'OA'OGA:**

1. E fa'aaogaina e le Atua manu e pei o asini e fa'ailoa mai ai lona finagalo.
2. E fa'amanuia le Atua i e fa'atuatua.
3. Aua le fa'asauā i meaola.

.....

**ASO SA:**

**26 OKETOPA 2025**

**MATAUPU: O IESU MA LONA SA'ILI MAI**

**SINI:** Ia malamalama le vasega e saili mai pea le Alii i le tagata ina ia faaolaina.

**TUSI FAITAU:** Luka 15:8-10

**FESOASOANI MO FAIA'OGA:**

O la tatou mataupu o lenei taeao, o Iesu ma lona sa'ili mai. I le tusi na tatou faitauina, o lo'o fa'amatalaina ai e Iesu le fa'ata'oto i le fafine na i ai lana tupe e fuagafulu poo tupe siliva e sefulu. Na leiloa le tupe e tasi, ma ua ia finau e saili ina ia maua. Fai mai na ia tutu le afi e matua fa'amalamalama ai, na tafitafi foi le fale ma matua sa'ili lava ina ia maua. Ina ua toe maua le tupe a le fafine, sa ia logo ana uo ma e tua'oi ina ia latou olioli ma ia, ina ua toe maua lana tupe na le iloa.

O le a'oa'oga a Iesu, e fa'apena le olioli i luma o agelu a le Atua, ona o le tagata agasala e to'atasi ua salamo. O le mea moni, i le fa'auigaina o lenei fa'ata'oto o lo'o fa'ailoa mai ai le galuega sa'ili mai a Iesu le Alii mo le tagata agasala ua le iloa po ua alu ese e fai lona lava loto. E matua sa'ili mai e Iesu i lona alofa lavea'i ma lona alofa fa'amagalo, ina ia toe maua lava le tagata agasala, ia aua ne'i le iloa ma fano atu ai. O le olioli foi ina ua toe maua le tagata agasala, e lagona ai le viiga e faia e agelu i luma o le Atua i le lagi. A o'o ina tatou sese ma le iloa i le agasala, e sa'ili mai lava Iesu i lona alofa naunauta'i ina ia toe maua i tatou. E pei ona ta'ua le tutu o le afi ma tafitafi le fale e sa'ili le tupe na le iloa, e fa'apena le sa'ili mai o Iesu mo le tagata agasala, na o'o lava ina ofo atu le soifua o Iesu Keriso e fa'asatauroina, ina ia lavea'iina ai le tatou agasala.

**Uiga o Upu::**

i) tafitafi - fa'amamā ina ia maua se mea ua

- |      |                |   |   |
|------|----------------|---|---|
|      |                |   | le iloa                                 |
| ii)  | sa'ili         | - | su'e se mea                             |
| iii) | olioli         | - | matua fiafia ma le loto fa'afetai       |
| iv)  | tagata agasala | - | tagata ua faia se amio leaga ma<br>sese |
| v)   | fuagafulu      | - | sefulu tupe siliva                      |

## **GALUEGA FA'ATINO: FAATINOGA**

Ia fai se fa'atinoga pu'upu'u o le tala i le su'eina o le tupe, ma ia maua ai se va'aiga i le toe maua o le tagata agasala.

**PESE:**           Sa ou le iloa i le vaofilifili i le ala. (Monalisa)  
                   Sa ou le iloa i le vaofilifili i le ala  
                   Pei ita o se mamoe iti ua se i le ala  
                   Leai ose faamoemoe mo se faaolataga  
                   Ua lata mai le ao ua lata mai le malamalama

**Tali:**       O Iesu, le leoleo mamoe  
                   Sa Ia tausiana o a'u, ma oe  
                   O a'u sa leiloa, ae ua toe maua  
                   Sa ou oti foi, ae ua toe ola.

## **A'OA'OGA:**

1.       E sa'ili mai pea Iesu ia i tatou.
2.       E ao ina toe salamo le tagata agasala.
3.       O Iesu o le Alii alofa.

.....

## **MANATU TA'IALA O NOVEMA:**

### **OLAGA TOE FA'AFOU**

O le tagata ma lona ola, e fiafia e ola i le olaga tuai, ma le fiafia i faiga a le lalolagi. Ua avea ma ala ua leaga ai ma palapala ai i

le agasala. O le feau lea mo lenei masina, o le fa'afouina o le ola, ina ia avea ma tagata fou. Ia a'oa'oina le fanau ina ia o latou iloa ma ia o tatou iloa, le tāua o le olaga ua toe faafou, ae le o le ola i le olaga tuai e fano ai.

**ASO SA: 2 NOVEMA 2025**

**MATAUPU: O KORU, TATANO MA APIRAMO, O TAGATA TETE'E.**

**SINI:** Ia malamaalama le vasega o tagata tete'e e le i'u manuia

**TUSI FAITAU:** Numera 16:25-35

**FESOASOANI MO FAIA'OGA:**

O la tatou mataupu o lenei taeao e fa'atautu ia Koru, Tatano ma Apiramo o tagata tete'e. I le tusi na tatou faitauina, o lo'o ta'ua ai i latou nei ua latou fesiligia le ta'ita'iga a Mose ma Arona, pe aisea ua sili ai i la'ua nai lo latou. Ua latou fa'apea ane ua aumai i latou nai Aikupito ina ia pologa ma feoti ai i le vao. Ua latou fia fai ma ositaulaga ona o latou o sa Levi, ae le fia mulimuli i le ta'ita'iga a Mose ma Arona. Ma ua mulimuli atu ia i latou tagata e to'a 250 o nisi foi o tagata na tofia i tulaga mamalu e Mose.

Ona faiatu lea o Mose, o a taeao o le a fa'aali mai ai e le Atua lona finagalo, ae ia outou aumai ni salefu ma avane i ai ni afi ma ni mea manogi e ofo atu ai mo le Alii. Ua fetalai mai foi le Alii ia Mose ina ia vavaeeseina o i la'ua mai ia i latou, se'ia ona fa'aumatia i latou pei o le emo o le mata. Ona fai atu lea o Mose i le nu'u ina ia o ese aua le fa'alatalata atu se tasi i ia tagata ma o latou aiga, ina nei fano i latou i agasala a ia tagata. Ua tutu mai foi nei tagata tete'e i faitoto'a o latou fale'ie, ma a latou ava ma atalii ma tama iti.

Ona fai atu lea o Mose o le a fa'aalia o ia lava na auina mai e le Alii ae le o sona loto. A fai ae oti ia tagata e pei o le oti o tagata uma, ona iloa lea e le i auina mai ia e le Alii. Ae a fai e fa'amaga

ane le eleele ma folo ai i latou ma latou ava, ma atalii ma tamaiti, ma latou o ifo i seoli, ona iloa ai lea e le nu'u, ua inoino ia tagata i le Alii.

Faimai ina ua uma atu upu ia a Mose, ona fa'amaga ane lea o le eleele ma folo ifo ia te i latou ma o latou aiga uma, ona toe soso'o ane lea o le eleele i o latou luga, a ua fano lava i latou. Ua sosola tagata e to'a 250 na 'au ma i latou, peita'i na o'o atu le afi ma fa'aumatia ai i latou uma.

Ioe, na fa'aalia lava e le Alii le i'uga mataga ma le fa'afanoina o e na tete'e ia Mose ma lana ta'ita'iga. E leaga le tete'e i ta'ita'i na tofia e le Atua aua e fa'asalaina ai ma fa'amalaiaina ai. Na fai e nei tagata le amio leaga, ae fano uma ai ma a latou ava ma fanau uma.

### **Uiga o Upu:**

salefu - mea e fa'amu ai mea manogi ma taulaga  
tete'e - o le fa'atautavā ma fa'asagatau mai  
folo e le eleele - ua fa'amaga le eleele ae pa'u'u i latou i le manava o le eleele

### **GALUEGA FA'ATINO: TALIGA FESILI.**

1. O le a le ituaiga o Isara'elu e omai ai tagata na tete'e ia Mose ma Arona?

*Tali: O Sa Levi*

2. Aisea na tete'e ai nei tagata ia Mose ma Arona?

*Tali: Ona o le fia avea ma ositaulaga e pei o Arona.*

3. O fea e omai ai isi tagata e 250 lea na auai i le tete'e?

*Tali: O isi foi tagata taualo ma tulaga mamalu ua fa'aseseina e Koru ma Tatano.*

4. O le a le i'uga o tagata na tete'e?

*Tali: Na folo i latou e le eleele, e aofia ai a latou ava, ma atalii ma tamaiti.*

**PESE:** 122 (Pese ma Viiga) O outou e fia sao i le ola i luga.

**A’OA’OGA:**

1. Ia fa’alogo i le ta’ita’iga na tofofi e le Atua.
2. E a’afia le soifua ma le ola pe a le usita’i.
3. Aua le alu i ta’aiga e i’uvale ai.

.....

**ASO SA:** 9 NOVEMA 2025

**MATAUPU:** O LE VALAAUINA O ISAIA

**SINI:** Ia malamalama le vasega o le vala’auina o Isaia na toe aumai ai le fa’amoemoe mo le nu’u o le Atua.

**TUSI FAITAU:** Isaia 6:1-13

**FESOASOANI MO FAIA’OGA:**

O le mataupu o lenei taeao, o le vala’auina o Isaia. Fai mai upu tomua na tatou faitauina, o le tausaga na oti ai le tupu o Usia, na a’u iloa ai le Alii o afio i le nofoalii silisili ma le maualuga, o Ona pito ofu foi na tumu ai le malumalu. O le fa’ailoga o le soso’o o le fa’anoanoa ma le leai o se fa’amoemoe ina ua oti Usia le tupu sa ta’uta’ua ai Iuta, ae fa’aali mai loa le silisili ese o le Atua ma ona pito ofu na tumu ai le malumalu.

O lona uiga, o le fe’au o le fa’amoemoe ola mo le nu’u sa foliga le amana’iaina. Aua o Usia sa mamalu lana nofoa’iga, ae na oti lepela ina ua sosopo i faiva o le ‘auositaluga ina ua ia alu ane e osi le taulaga ae le o sana mea lea e fai. Ae pei ona fai mai ulua’i

upu o le mataupu na tatou faitauina, o le tausaga lava lea na vala’auina ai Isaia mo le galuega fa’aperofeta.

O le tulaga agasala o le nu’u na amata mea ai Usia le tupu ua oti, o lea lava e ta’atia to’ilalo ai ma le itu fa’aleagaga o le malo ma lana tapua’iga. A lea na iloa i le tali atu a Isaia i le fa’aali mai o le silisiliese o le Atua i lona malumalu. Faimai Isaia, “Aue a’u nei auā ai a’u a fano, auā o a’u o le tagata laugutu leaga, matou te mau foi ma le nu’u laugutu leaga”.

Vasega feoloolo, o le mea lea na ta’ua ai pito ofu o le Atua na tumu ai le malumalu, o lo’o fa’asino lea i le manumalo o lona pa’ia ma lona alofa. E masani tupu o le lalolagi pe a latou fa’ato’ilaloina se isi tupu, ona aumai lea o pito ofu o le tupu to’ilalo ma su’i fa’apipii i tu’upao o le ofu o le ua manumalo. O le mea lea na va’aia ua tumu le malumalu i pito ofu o le Atua, o lona uiga ua silisili lava Ia i tupu uma lava i le pa’ia ma le alofa. Ae o lona fa’aali ia Isaia i le malumalu, o le fa’amoemoe lava lea mo lona nu’u. Ae ao ona fa’amama ma fa’apa’iaina ma fa’amamaluina ma ua tu’u mai ai i laugutu o Isaia le malala ola e fa’amamaina ai o ia. Ona soso’o loa lea ma le vala’auina o ai se alu atu mo le Alii. Ona tali lea o Isaia ina ia auina atu o ia.

Ioe, o le vala’auina lena o Isaia, ua aumaia ai le fa’amoemoe o le fa’afouina o le vala’auina o le nu’u o le Atua.

### **Uiga o Upu:**

- i) pito ofu - tu’upao o le ofu
- ii) malumalu - le fale e osi ai taulaga ma tapua’iga
- iii) laugutu leaga – o se tagata tautala fa’api’opi’o ma tau’ole’ole

### **GALUEGA FA’ATINO: TALIGA FESILI.**

#### **Tali i fesili.**

1. O ai Usia o lo’o ta’ua i le tusi faitau?

*Tali: O le tupu o Iuta.*

2. O le a le vai tau na vala'auina ai Isaia?

*Tali: O le tausaga tonu na oti ai Usia.*

3. Aisea na tu'u mai ai malala ola i laugutu o Isaia?

*Tali: Ina ia fa'amamaina ai lana agasala.*

4. O le a le tali a Isaia ina ua fesili mai le leo po'o ai e alu atu mo le Alii?

*Tali: O a'u lenei ina auina atu a'u.*

**PESE:** 181 Pese ma viiga.

**A'OA'OGA:**

1. O le Atua le fa'amoemoe o tagata uma.

2. E vala'auina e le Atua le ua Ia finagalo i ai.

3. Aua le te'ena le tofiga mai le Atua.

.....

**ASO SA: 16 NOVEMA 2025**

**MATAUPU: O LE VANU O PONAIVI MAMAGO**

**SINI:** Ia malamalama le vasega, o le Atua fai vavega na te aumaia le ola i mea ua leai se ola.

**TUSI FAITAU:** Esekielu 37:1-14

**FESOASOANI MO FAIA'OGA:**

Talofa tamaiti; o le tatou mataupu i lenei Aso Sa, e faatatau lea i ponaivi mamago. Masalo tou te le'i vaai lava i ni ponaivi o se tagata oti. Atonu foi ua outou vaai i foliga vaaia o se vanu i o tatou laufanua.



Peitai, o le ofoofogia o le Atua ma lona mana, ua na faaalii ai lana Pule Aoao, e ala i le toe ola mai o ponaivi mamago, pei ona Ia fa'aali i le perofeta o Esekielu. Faimai le Atua ia Esekielu, "Le atalii e o le tagata, e mafai ea ona toe ola o ia ivi?" Tali le perofeta; "Le Alii e le Atua e, ua e silafia lava oe." Toe fetalai le Alii; "Ia e vavalalo atu i na ivi, ma e fai atu i ai, Ivi mamago e faalogologo mai ia i le afioga a le Alii. Faauta, ou te faaulu ane le mānava i totonu ia te outou, ona ola ai lea;"

Manino lelei le fetalaiga tuu sa'o a le Alii, e oo lava i le poloaiina o le perofeta ina ia vavalalo atu i ivi mamago nei, aemaise lava o lenei, ua faapea mai le Alii, "Manava e, ina sau ia mai matamatagi e fa, ma ia manava atu i ia tagata fasia, ia latou ola ai."

Ioe o le Atua pule aoao ma le Atua fai vavega, na toe fesootai ai ponaivi ma itutino o le tagata po o tagata, ma toe ola uma ai le itu taua, e matua toatele lava. E le gata ua toe ola mai, ae ua faailoa atu i le perofeta ina ia ta'u atu, "Faauta, lo'u nuu e, ou te lagaina o outou tuugamau...", ma ava'e i latou ai o latou tuugamau ma tuuina i ai Lona Agaga i totonu ia te'i latou, e ola ai i latou uma.

O le ata lena o le faamoemoe ola pei ona finagalo ai le Atua, i lona faailoa atu o Ia lava o le Atua o le ola ma o loo ola lava. E leai se isi atua po o se isi malosi ese mai, na te mafai ona faaolaina o ni mea ua mamago ma lē aogā, i se faamoemoe e toe ola mai e ala i lona mana alofa ma lona mana faaola. E le gata e toe aumai e le Atua le ola, ae faanofofilemuina ai i latou i o latou laueleele, pei ona finagalo ai le Atua mo lona nuu.

Ua a'oa'o mai lenei tala mo i tatou le fanau, ina ia tatou mautinoa, ua na'o le Atua e toatasi, o Lē na faia mea uma lava e i ai ma le tagata, ona Ia faaolaina i tatou o tagata agasala, i lona Alofa Tunoa tele, pei foi ona faia e Iesu Keriso e ala i lona maliu ma lona toetu manumalo, lea ua tatou maua ai le ola, ma le ola Faavavau faatasi ma Ia.

## **GALUEGA FA'ATINO: FAATINOGA**

Faatino mai le tala i le toe ola mai o ivi mamago. (3 – 5 minute).  
Ia fesoasoani lau Susuga i le faiaoga i le faasologa o le tala e pei ona faitauina.

**PESE:** 144 (Pese ma Viiga) Ua soona olioli nei.

Poo le “Ponaivi, ponaivi”.

**A’OA’OGA:**

1. Ua na’o le Atua tatou te ola ai.
2. Tumau i le faatuatua e te maua ai mea sili.
3. Ola mautinoa ma faalagolago i le Atua i taimi uma.
- ‘4. Aua le ola faamaualuga, e te le maua ai se filemu

.....

**ASO SA: 23 NOVEMA 2025**

**MATAUPU: O LE IERUSALEMA FOU.**

**SINI:** Ia malamalama le vasega o Ierusalem Fou, o se foafoaga fou ua faia e le Atua, o iai le matagofie ma le olioli faavavau e maua ai, mo le tagata faatuatua.

**TUSI FAITAU:** Fa’aaliga 21:1-8

**FESOASOANI MO FAIA’OGA**

O le mataupu ua aumai mo i tatou i lenei Aso Sa e faapea; ‘O le Ierusalem Fou.’ E manatu ua tatou iloa ma malamalama i le aai o Ierusalem, poo le Aai paia i totonu o Isaraelu. Le aai o loo ogatotonu ai le malumalu o le Atua, o loo fai ai tapuaiga o le nuu o le Atua. Peitai o le Ierusalem Fou lea o loo talanoa ai le Tusi o Faaaliga, pei ona faamatalaina e fuaiupu 1 – 8, ia Ierusalem fou o se foafoaga fou ua faia e le Atua, e le maua ai se tiga, se puapuaga, ma se tagi. Ma ua faamatalaina ai foi le moni o lenei foafoaga fou ma le matagofie o le olioli e maua ai, e ala i le faailoa mai, o le Atua lava o Ia e i ai faatasi ma ona tagata faatuatua i le olioli ma le manuia lea. E maua le avanoa e ulufale ai le tagata faatuatua i le nuu fou po o Ierusalem fou ua vaia nei. O le nuu

fou ole'ã taoto mai luma e fai mo le tagata ua faafouina lana amio i le amio e tatau ai, e tusa ma le finagalo o le Atua.

E faamatalaina e le fuaiupu e 2 le nuu o Ierusalem, o se nuu fou ma paia, ona e alu ifo mai le Atua o le lagi. O se nuu matagofie ona na teuteuina lelei e le Atua. E matagofie mea uma e faia e le Atua. Po o a lava mea mataga o le ola nei, na o le Atua lava e mafai ona faamatagofieina. I le tulaga tau le amio o le tagata faatuatua, o le tagata e faaogatonu le Atua i lona ola, e foliga ma ola matagofie. Mo se isi ituaiga ola, na o mea lē lelei ma mea matagã e iloa ai ma maua ai. Ua faailoa mai ai foi, o le isi uiga o le faafouina, o le faapaiaina.

Ua toe faamamafa mai foi e le faaaliga lenei e pei ona ta'ua i le fuaiupu e 3, ia le mautinoa o le auai mai o le Atua i ona tagata faatuatua. O le mautinoa o le alofa femulimulita'i o le Atua e moni ma faamaoni mo ona tagata molimau tumau. Ua faailoa mai ai, o le Atua, na te soloiesea loimata i fofoga faanoanoa o ona tagata faatuatua. E le toe i ai se faanoanoa po o se lauë, auã e mavae atu mea na aumaia le faanoanoa, ae fesaga'i ma le Atua, e na te aumaia le olioli e faavavau. O le faamalosi'au ma le faamafanafana a le Atua mo ona tagata faatuatua i le ola nei, ona e le 'alo le loimata maligi ona e tutupu lava tiga ma faigata i lenei ola.

I fuaiupu e 5 – 8, ua toe folafola ma tautino mai ai e le Atua, ua na o ia lava e mafai ona faafouina mea uma, auã o ia o le Atua foafoa. O le Pule Aoao, o le Alefa ma le Omeka. O le feau oloo momoli mai, e mafaia mea uma i le faatasi mai o le Atua, pe afai e taliaina e le tagata, o le Atua o le Mana Silisiliese ma le Malosi uma lava. Tamaiti, o le Ierusalem Fou lena, ua faailoa mai e le Atua, e tapena ai ma le faatuatua, tatou te ulufale atu ai ma mafuta faatasi ai ma Ia e faavavau.

### **Upu ma Uiga:**

- i) Alefa – o le ulua'i mata'itusi lea o le alafapeti (Alphabet) a le au Eleni.
- ii) Omeka – o le mata'itusi mulimuli lea o le alafapeti

(Alphabet) a le au Eleni.

**GALUEGA FA'ATINO:** Faaaliga manatu.

Faaali mai sou manatu e tusa o le 'Ierusalem Fou' pei ona aumai i le mataupu. O le faamoemoe mo le fanau ina ia manino ma malamalama i le nuu fou ua saunia e le Atua mo na o i latou e amio lelei ma fiafia i le Atua.

**PESE:** 122 (Pese ma Viiga) O outou e fia sao.

**A'OA'OGA**

1. Ia ogatotonu le Atua i lou ola.
2. Onosa'i i puapuaga ma faigata e ala i lou tumau i le Atua.
3. Faailoa ma tala'i atu le Ierusalem Fou i lou aiga ma lou nuu.

.....

**ASO SA:** 30 NOVEMA 2025

**MATAUPU:** O LE MALUMALU O LE FALE TATALO, AE LE O SE MAKETI.

**SINI:** Ia malamalama le vasega, o le falesa, e tapua'i ai le tagata i le Atua i le agaga ma le faamaoni, ae le'o se fale tafao ma ulavale ai

**TUSI FAITAU:** Mataio 21:10-13

**FESOASOANI MO FAIA'OGA**

O le tatou mataupu e tusa o le Tusi Faitau o loo aga'i tonu i le taimi na malaga atu ai Iesu i le malumalu i Ierusalem. Ua silafia e Ia nisi e toatele ua feaataua'i manu i le malumalu. Faimai ua Ia fuli i lalo laulau a e ua faatau tupe, ma nofoa a e ua faatau

lupe. O foliga lava o se fale faatau oloa pei o se maketi i nei aso. O le faailoga o le malaia o le a oo i le aai. Faimai a Ia; “Ua tusia, ua ta’ua lo’u fale o le fale tatalo; a ua faia e outou ma ana o e faomea. O mea na o lea tutupu, aua ua leiloa e i latou ona po ua asia mai ai i latou e lo latou Faaola. (Luka 19:41-44). Ua uma ona tulia i latou ina ia faamamāina ai le fale o lona Tama.

Upu tuusa’o a le Alii o Iesu i tagata ua ola i le agasala, ua ese la latou faamamafa ma le faataua, ai lava ona o le malosi mai o le pulega a Roma, ma a latou tulafono. Ua leai se Atua i o latou loto ma agaga pe a fua atu i le malumalu tapuai o le Atua, ma mea oloo faia ai. Ua le o se fale tatalo mo i latou, a ua avea ma ana o tagata faomea, ua fai ma fale o tagata solitulafono ma agasala, ua saili ai le tamaoaiga ma le ‘oa faale-lalolagi, a ua le saili le Atua ma Lona Malo o i ai manuia e tele

O se faamanatu taua tele lea mo i tatou le fanau, i lo tatou omai i le falesa poo le malumalu tapuai o lo tatou Atua i lea Aso Sa ma lea Aso Sa ma nisi o aso faailogaina, Ia tatou lagona faatasi le taua ma le faamoemoe o le fale tatalo, tatou te tapua’i atu ai i lo tatou Atua ma ave le viiga ma le faafetai ona lona alofa ma lona agalelei ia i tatou uma. O le fale e mo le Atua e taupati mai i ai tagata uma e ifo ma tapua’i ia te Ia i le Agaga ma le Faamaoni i lona Suafa e le aunoa.

## **GALUEGA FA’ATINO: FAATINOGA**

Ata faataitai: Faatino mai le vaaiga lenei i le malaga atu o Iesu i le malumalu ma ana faatinoga na faia ai, faatasi ai ma ana upu sa fai i tagata.

**PESE:** 193 Pese ma Viiga (Ua fiafia a’u nei)

## **A’OA’OGA:**

1. Ia faataua ma le ola tapua’i i le Atua i taimi uma.
2. Ia atagia i a tatou amio, o upu ma tala lo tatou ola faapaiaina mo le Atua.
3. Faamuamua le Atua ae faatuatuaana’i mea o le lalolagi.

.....

**MANATU TA'IALA O TESEMA:  
UA AFIO MAI LE TUPU.**

O le masina lenei e faamanatuina ai e le au Kerisiano uma le Afio mai o le Tupu o Tupu, e ala i le fanau mai o Iesu. O le feau mo i tatou uma aemaise o le fanau, ina ia saunia loto o tagata uma, mo le Tupu ua Afio mai, o Iesu lea, le Pepe o le Kerisimasi.

**ASO SA:                   7 TESEMA 2025**

**MATAUPU:               TAPENAGA MO LE AFIO MAI O LE ALII**

**SINI:**                    Ia malamalama le vasega e ao ona tapena lelei ma sauniuni tatou uma mo le afio mai o le Alii.

**TUSI FAITAU:**        Ioane 1:14-23

**FESOASOANI MO FAIA'OGA:**

O le tatou mataupu mo lenei Aso Sa o loo fapea mai, 'Tapenaga mo le afio mai o le Alii.' O loo faailoa mai e le tusi lenei a Ioane, e i ai le faamoemoe ma le tapenaga o le tagata faatuatua mo le afio mai o le Alii. O le ala lea o le faaigoaina o le vaitau lenei o le Etiveni aua o le afio mai o le Alii, o le oo mai lava lea o le Malo o le Atua ia i tatou o tagata faatuatua ma ola i lona finagalo paia.

O le tusi lenei a Ioane o loo taula'i lava ma ave lana faamamafa i le itu faaleagaga, e tusa ai ma ana faamaumauga ma tusitusiga. Peitai i le Tusi Faitau mo lenei Aso Sa o loo amata lava i le Upu a le Atua ua liu tino tagata. Sa mau o ia ma i tatou, na matou

matamata foi i lona mamalu; o le mamalu lava lea o le Alo e toatasi o le Tama, ua tumu o ia i le alofa tunoa ma le faamaoni. O lona uiga ua faailoa mai e Ioane le mautinoa o le afio mai o le Alii ma le tapenaga a le tagata e ao ona fai. E pei lava ona valoia i le amataga e le auga perofeta I le Feagaiga tuai, le afio mai o le Alii, o le Mesia e faaola le lalolagi.

Peitai la le tapenaga na faia e Ioane e tusa ma lona valaauina, o lea ua faataunuaina “O ia lenei sa a’u fai atu ai, O Iē mulimuli mai, e sili o Ia ia te a’u, auā o ia na muamua ia te a’u.” O le afio mai o le Alii o Iesu le Alo o le Atua I le lalolagi, o le faaali tino mai foi lena o le Alofa Tunoa o le Atua mo le tagata ina ia salamo ma faatuatua ia te Ia. E le o le tulafono le mea taua pei ona laulauvivilu ai le au Iutaia, a o le olaina o le finagalo o le Atua ma tumau ai o le faamoemoe lea mo le tagata talitonu ma le faamaoni. Le ala lena na tuufesili ai le au ositaulaga ma Sa Levi ia Ioane po o ai ia “O ai ea oe? O Elia ea oe? O le perofeta ea oe?” Tali tuu sa’o Ioane i e le malamalama faimai; “O a’u o le leo o le alaga i le vao, Ina faalaulelei ia le ala o le Alii.”

Tamaiti e o le Vasega feoloolo, o le faamanatu taua tele lea mo i tatou. Ia ola tapenapena ma sauniuni ma le loto fiafia e talia le afio mai o le Alii. ‘Aua le faatali seia i ai se aso po o se tausaga, ae tapena nei loa lou tagata atoa aua le afio mai o le Alii.

### **Upu ma Uiga:**

- i) liu tino tagata – e faatatau i le Atua, ua liua e avefa  
ma tagata
- ii) upu – E faatatau ia Iesu. O Ia lava o le “upu”.

### **GALUEGA FA’ATINO: FA’ATALANOAGA**

Fefaasoa’i manatu o le Vasega e uiga i le tapenaga mo le afio mai o le Alii. Autu, “O le a sau tapenaga mo le afio mai o Iesu”.

**PESE:** 147 Ia e afio mai

**A’OA’OGA:**

1. Ia tapena ma sauni i taimi uma.
2. Ia ola faapaiaina i aso uma.
3. E auai mai le Atua i au tapenaga uma.

.....

**ASO SA: 14 TESEMA 2025**

**MATAUPU: O LE FANAU MAI O IESU.**

**SINI:** Ia malamalama le vasega o le fanau mai o Iesu, o le oo mai lava lea o le Malo o le Atua ma lana Faaolataga mo le lalolagi uma.

**TUSI FAITAU:** Luka 2:1-20

**FESOASOANI MO FAIA’OGA**

O le fanau mai o Iesu le Alo o le Atua, o se ata vaaia lena o le Atua ma lona Alofa tunoa. O lona fanau mai ma lona afio mai, na fanau mai i se ala maulalo ma le filemu. Na ui mai i se ala faatauvaavaa ma le le iloa e le lalolagi, o le Alo o le Atua ua soifua mai.

A o ona po na fanau ai Iesu, o le taimi foi lea na mavae ai taua i le va o le Malo o Roma ma nuu e tele o le lalolagi. O le pule la a Aokuso ma le malosi o le malo o Roma i lea vaitau, lea na fai ai loa lana poloaiga ia tusia igoa o tagata uma i nuu uma ua ia pule ai. O le tulafono la lenei na ala ai ona ona o ifo Iosefa ma Maria mai Nasareta e o atu i Peteleema, o le aai o Tavita i Iutaia, ina ia tusia ai o la igoa faatasi ma tagata o le aiga o Tavita. Ua la saili le fale po o se mea e mapu i ai, lea la ua na’o le fale povi. Na fanau ai e Maria lana ulumatua, ua ia ‘aui ia te ia i le ie, ma



faataoto ia te Ia i le mea e tuu ai mea e aai ai povi. O leoleo mamoe i le po na fanau mai ai Iesu na faafuase'i ona pupula faataliolio mai ia te'i latou le pupula o le Alii. Sa mata'utu'ia i latou ma tau sosola, a ua fetalai mai le agelu ia te i latou, "Aua tou te matata'u," i le ua faapea mai; "Ou te aumai ia te outou le Tala Lelei e olioli tele ai le nuu uma" aua o lea lava aso "ua fanau ai i le aai o Tavita lo outou Faaola o le Alii ia o Keriso" O le a latou maua o Ia, o le tama meamea, ua 'aui i le ie, oloo taoto i le fale povi. Ua uma le fetalai a le agelu, i le ua to'ia lava le va i lea po e le 'au e toatele mai le lagi, ua latou faapea ona pepese; "O le viiga i le Atua i mea aupitoaluga, ma le manuia i le lalolagi; o le finagalo alofa i tagata". Sa ofo tele le au leoleo mamoe i ia mea ua latou faalogo i ai ma vaai i ai. I le ua faatalise atu i Peteleema, ua maua ai Maria ma Iosefa ma le tama meamea o taoto i le fale povi. Ua ofo Maria ma Iosefa i le tala i le au agelu e faasino i le tama. Faimai ua teu foi e Maria ia upu uma i lona loto. Na toe foi leoleo mamoe o vivii ma faafetai i le Atua "ona o mea uma na latou faalogo ai ma vaai i ai."

Ioe le fanau e i lenei Aso Sa, o le fanau mai o Iesu i le ala maulalo ma le faatauva, o le ata lena o le malo o le Atua ma ona tagata, e finagalo le Atua e laveai ma faaolaina ona tagata ua pauu atu i le agasala, e ala i le salamo ma faatuatua faamaoni. Ma ia tumau pea ona fai viiga ma fai pesega i le Alii o Iesu ma le loto faafetai, ina ua Ia faaola ia te oe ma a'u, ma maua ai e i tatou le Ola, ma lona Malo Faavavau.

## **GALUEGA FA'ATINO: FATALANOAGA**

Fefaasoa'i manatu o le Vasega e faatatau i le fanau mai o Iesu, ma lou taimi na e fanau mai ai.

(O a ni eseese ma mea e tutusa ai?)

**PESE:** Ua fanau mai o Iesu i Peteleema...

**A'OA'OGA:**

1. Ia fiafia ma olioli ua fanau mai Iesu mo i tatou.

2. Ia fanau Iesu i totonu o lou aiga.
3. O Iesu le Faaola mo tagata uma  
.....

IA MANUIA LE KERISIMASI...